

鄧崖先生詩集

黃維琯敬署



PL  
2710  
.E9





Digitized by the Internet Archive  
in 2010 with funding from  
York University Libraries





YORK UNIVERSITY

JUL 03 2001

EAST ASIAN STUDIES

鄒崖先生詩集

卷首

一

扉頁

鄒崖先生詩集

邑後學何琳惠敬書



先師鄒崖先生詩集

意蘭畫舍藏本

一九八五年歲次乙丑仲夏 弟子 張丹敬刊

宣統元年冬月即亥和為六所錄五



六言歌子詩三

招枯柳移牙

鐵索橋沙疎

羊皮漏紅蓮

而今一筆經句

銷

鄒崖史丹頌

以贈

梁丹女弟子



更風雪乾清夜可似蒲團自在眠



鄒崖遺稿目錄

卷首

自序

伍序

溫序

傅序

張序

卷一

古近體詩一百零九首 另附詩七首 詞二闕

卷二

古近體詩一百零六首 另附詩五首

卷三

古近體詩六十四首 另附詩七首

卷四

古近體詩七十一首 另附詩八首 詞一闕


卷五

古近體詩六十二首 附鹽微閣詩鈔

卷末


附錄 函札 揭帖 電文

跋



自序

詩以人傳人不以詩傳德業無所成死後遺詩文數卷此最傷心事也辛亥前雅不欲以詩鳴不得已偶作率不存稿每見舊詩輒憎厭胸中似別有高妙者覓之終不可得朋輩不知我者以扇箋索錄舊作苦憶如夢嚙國變後棄官南歸於破簾中蒐集得數十篇益以比年傷亂之作彙鈔一冊殆多有不得已於中者然祇此區區應酬之作不免雜出已自恨其多矣王之渙所傳不過六篇裴說行卷祇十九首古人豈以多爲貴哉十篇以後意境大略相似劉長卿且然何有於末學斷乎不足存也我死三十年後乃可出眎人略紀行藏崖略云爾鄒崖逋者自識






伍序

詩以人傳人不以詩傳此翺高先生自序其鄒崖遺稿之語也其意似重人而不重詩予謂人固當重詩亦不能輕予知翺高先生博學通才以名進士當京官二十年中經甲午之役戊戌維新之變庚子義和團之禍乃至辛亥之退位先生皆親歷之發而爲詩皆史詩也先生天性至厚情之感人亦至深讀其詩不覺心弦震動有時泣然流涕其詩有唐人風格亦有宋人氣味不規規於古人而自闢新境界此詩之可傳也先生人格高潔持正不阿孤忠耿耿常具摺劾軍機大臣兵部尚書孫毓汶驕庸誤國六大罪有海忠介之風又嘗參贊張蔭棠入藏議商約面折英使爲藏人除弊興利藏人皆愛戴之臨去藏人遮道焚香跪送此人之可傳也旣以可傳之人加以可傳之詩當爲世所珍重然先生尙憊然不

自足慮其詩之不能傳也先生爲詩多不存稿今年春仲先生哲嗣鴻平與先生女弟子張丹積多年蒐集將校刊之問序於予予與先生同邑且爲忘年之交只因奔走天涯親炙先生之日少國變後先生南歸爲桑梓故不得已應大吏之聘修鄉志辦鄉團晚年遯跡香江教書自食先生詩云京華親舊晨星少末世文章秋氣多其晚年心事可知矣先生於庚午八月病逝香港私第享壽六十有六歲予游踪時在北美不及送先生之喪曾作輓詩云海外忽傳泰岱頽大禽繁殖構人災驚心故國衣冠盡絕望重陽風雨來誰復登高能作賦人將送酒爲停杯叢殘抱缺孤窮後可有遺書贖幾回由今追憶蓋二十九年矣先生臨終囑其後人三十年後方可刊其詩此殆孔子作春秋之意對當世公卿大夫有所貶損不欲以書見也然今何時耶世變日亟不可思議知我罪我

寧復較量三十年之期亦已近歷史公論終不能久沒也爰本斯  
旨序先生之詩後之讀者或亦知小雅之遺音歟戊戌仲夏順德  
伍憲子序於九龍



溫序

孔子論詩主思無邪靖節詩云稱心而言人亦易足斯語吾胥服膺蓋詩之風格殊途而指歸在是邑彥何丈翺高工詩遺鄒崖詩集若干卷當清季官外務部及于役西藏時憂危念亂有顧瞻周道之嗟辛亥後以冬郎之清聲表皋羽之苦節或仕或已所作皆稱心之言不願其外不出其位協無邪之旨矣丈與先公心莫逆而盛酬唱其夢別云君向遼西我向秦相逢馬上話酸辛夢中蒼茫潼關路落月黃沙望北辰見懷云掛冠未忍去東華實錄知存萬戶家白髮刁騷舊史氏遺山流落尚天涯及先公輯感舊集亦多列其高製於以見交誼之篤惜余生也晚未承啓誨然浣誦遺篇輒生景慕又從高第弟子張曦丹女史獲聆懿德益敬其

躬行立言之相顧蓋深有得於無邪之旨者然也女史於余爲同鄉有世誼克踵北宮嬰兒子之孝行善繪事復能詩並研內典知其志切步趨淵源有自今將印鄒崖詩集督序於余余謂弼中彪外之作傳世可必奚俟鄙辭第念故家喬木之迹未湮文采清芬幸猶可誦矧女史食羹見牆遠而彌慕之用心尤不可及也彼操戈荒莊之流能無聞風興愧謹述所聞誌交舊之誼以應嘉命焉  
癸亥冬順德溫中行拜序

傳序

余少讀陳叔伊氏之近代詩鈔得覩順德何翽高先生七律數首蓋作於辛亥鼎革之時也句如明朝飢飽誰能料一姓興亡未足悲壞壁巧緣輸蝨蝨荒池狂吠厭蝦蟆緋袍尙愧孫供奉青史應慚王鐵槍人如秋去春來燕天有朝南暮北風心輒好焉乃欲求其全集而寢饋之不可得嗣於坊間購得黃公度先生人境廬詩見其律句之遣詞使事激宕瑰奇與先生有相類者然公度以革新詩體揭櫟於世者將及百年其詩開前古未有之風氣一時欲闢異途摹寫新事物者共推爲大家後生小子咸熟其名而獨知先生之詩者仍寡近由其高弟張丹女士以所存鄒崖遺稿屬爲校字因得徧讀其詩及其自注而知其人其事至確且詳其以應辦外事知名而爲外人所敬憚者與公度同其憤時勢之不可爲



感身世之不遇一寓於詩以鳴其意者與公度同其紀述禍變始末綦詳可以作詩史讀者亦與公度同兩家之詩固消息相通沆漑一氣者矣抑余又就其相同以求其相異者則公度不啻有意於自昌其詩更欲於古歌詩中存神去貌創爲新體以垂範將來而先生則反是以爲人之一生德業無所成死後遺詩文數卷是最可厭者嗚呼先生不欲以詩傳而卒傳其詩於身歿數十年之後使讀其詩者而知其人其事之有可傳也即以詩論其練格練氣能豪能婉能化俗爲雅能將遠域之奇景異態撮弄筆端一新世人耳目噫嘉道之遺響乎

指王仲瞿龔定庵一派之詩

同光之羽翼乎

抑晚清之新體詩也癸亥臘月後學傅子餘拜撰



張序


嗚呼自 先師鄒崖先生之卒二十有九年矣喆嗣鴻平世兄今將刊印遺稿以丹追隨 先生久其暮年事所知獨詳囑爲之序竊維 先生道德文章彪炳當世丹豈能贊一辭顧前塵歷歷不無可紀溯 先生以民國十九年庚午秋八月廿四日晨壽終香港般含道聖士提反里寓所諸世兄將奉柩還鄉相與恭檢遺著於架上得詩稿一帙展而讀之文有點竄眉有批注間亦有崔師伯樾評語朱墨並列蓋 先生手定本也先是 先生以及門鄧君爾雅善書曾約使繕正以備他日付梓諸世兄秉承遺命囑丹携致時鄧君居大埔一小村中路甚僻丹以一弱女子遽往深虞隕越適黃國芳先生方授丹英文與同行遂得面致鄧君厥後屢造其居詢繕寫事均言貧病未暇及也未幾而蘆溝橋變作文士

多集香江相見咸以 先生遺稿見詢歲庚辰楊師鐵夫以世變靡定 先生遺稿愼不可失遂索丹所藏副本爲之編次副本者

先生長孫肇穎手鈔 先生歿後三年鴻平世兄所贈者也編

既成楊師又爲之序其辭略曰按鄒崖逋者編者亦曾忝交游之末止知其爲溫溫長者而已今讀其遺集方知其忠愛之惓發於夢寐規畫之計壞於垂成其身可窮可死而其志不可屈亮直哉此公也斯言也可謂能知 先生已迨太平洋戰事起家人疏散丹獨奉母居港烽火驚心繼又病腦而一念 先生遺稿尙未刊行輒用耿耿客歲秋丹在港舉行繪畫二次展覽曾擬事畢即將先生詩稿敬付剗剗蓋 先生遺命其詩須俟三十年後始可面世以時考之宜可籌辦矣會鴻平世兄來自穗垣將赴美洲且擬行前將先人遺詩壽諸梨棗憶別後十有餘年音訊杳然今此

擬不約而同豈 先生之靈有以默啓之耶於是以前所藏 先生  
遺像及六十自述付之像以備刊餘則備校勘也傳曰明德之後  
必有達人今令嗣克承先業固所宜然而丹數十年來旦夕不忘  
者已可觀厥成殊用自慰顧曩者 先生所賜書翰經亂散佚而  
當年手付鄧君之 先生手稿今亦已不獲覩矣悲夫戊戌初春  
女弟子張丹謹誌於意蘭畫舍



鄒崖遺稿卷一



順德何藻翔高著

自西樵雲泉仙館至翠岩寺遇雨

光緒己丑前作兩帙散佚止存此

松徑入翠岩到寺日未午迴望七十峯峯皆烟雨峭壁捫莓苔  
陰巖懸石乳落葉積山廚亂竹圯廢圃雲氣裹樹影瀑聲亂人語  
懸崖臨黑潭却立莫敢俯偶然一失足枯骸飼豺鼠雷殷雲泉巔  
日暝官山浦水礁無人春殘僧只三五

乙未二三月間雜感和孝通剛甫

蟾蜍蝕春月萬里闇幽光璿室悶風雨綠苔生洞房高花明宿霧  
細草媚斜陽玉玦芳思寄摩挲欲斷腸

食蓼心忘苦含梅齒覺酸湘雲千里墨淮月五更殘瑤瑟怨烟夕  
筌篹生暮寒欲知春消息烽火斷三韓

謂湘淮軍

梅骨鏤春恨柳絲冒暮愁夕陽竟南下滄海欲西流孤憤知何補

狂歌不自休敦煌射雕手拋墮南山頭

董福祥馬玉崑久駐南苑

朝出藍田第暮登蘆水橋九年羊領護萬騎霍驃姚朔雪金貂冷

春風紫燕驕辦裝錢十萬燕市買蘭苕

桂公祥奉命統兵出關賞內帑五千治裝

漢印金魚紐摩挲熱血多

吳大澂得漢度遼將軍印因請出關鑒師朱雀岸講

藝白狼河露布排燕許軍書雜隸蜩遼金訪碑錄束筍萬牛馱

獬犬臥帝閭巫陽呼不聞

余約羅禮部鳳華赴察院奏劾軍機孫毓汶貪庸誤國李若農

師見疏稿大激賞乘槎天外使

張蔭桓赴日

解佩雲中君霧市晦冥合狼塵

歌哭紛東溝烟月白空弔鄧將軍

世昌

翩翩遼海鶴黯黯汝南雞落絮春無主荒榛路轉迷金丸彈燕雀

玉碎玻璃我有青龍劍持之鬪蒺藜

感時還惜別無路託文鱗醉蝶狂如虎唬鶯愁喚人故山有杜若



京洛無風塵且買新羅酒來賞婪尾春  
春思如亂髮十丈烟絲長有舌羞齊虜無心學楚狂因思蒼耳擷  
轉惜迷陽傷肉髻佛光乞綺窗焚夜香  
舊有茂陵病況登王粲樓客歸雪未霽鳥散烟空愁晚晚佳人惜  
騷魂矯士收那知桑乾水來日可回頭

贈江大戶部孝通

霜月照枯蘭魂澹玉思古白猿嚼松子香澀冬心苦石匣雙青龍  
山魃夜偷舞敗壁溼壁聲乾蓬啼風雨三尺劉伶墳一片乾淨土  
滌芷無淨根濁流無恬鱗督儒禽犢學芒軻吾眞羅浮雙玄鶴  
高唳入白雲人海紛蟻蠓太華簸粃塵千尺冬青樹常存天地春  
一盃蚬蛇膽熱腸浣冰雪天橋盪浩歌燕筑聲聲裂怪鷗啼寒煙

野狐拜山月躍冶不祥金摩挲芒刃折君子尙養源矯士思脩拙  
曲木惡榜檠塵魔纏瞿曇渴驢洩勃飲飢鼠髑髏饒編髮苔葦末  
瘖口苦喃喃冥神萬化表微霜冷湫潭素琴悽以怨落雁海天南  
淚萬行

瑤臺三首

張侍郎使英賀銀婚約充參贊梁觀察震東陳比部簡持皆隨行屬爲勸駕以  
家報婉辭之

鴝鳥瑤臺勸曉妝金刀未繡嫁衣裳巫雲不入蠻娘夢一曲離鸞  
一官自笑添蛇足異味何須食馬肝山妻來書做官不辦洋務不食馬肝未爲不  
知味十九年來胡婦戀幾曾西笑向長安

奉使有心隨博望逃名何計學韓康春風詞筆都忘却才盡江郎  
鬢已霜侍郎舟中語簡持曰翹高不來撰述無人矣殆習聞翁常熟師獎譽不知其才盡也



附錄贈別簡持詞點絳脣

幾日晴陰卷簾未識春深淺蝶輕風軟漫託柔絲綰一髮青山  
回首中原遠離期短舊遊腸斷算是懽場滿

贈別江大孝通竝束梁大任甫

孝通時赴西湖書院分校

忍淚吞聲立片時此人寧有出山期過江風雨晚來疾

張孝達聘充兩

湖書院分校

鼉憤龍愁亂我思

起三句梁節庵極賞歎之再三

熱血一腔無過佛殘釐半鉢冷於僧十年已覺津梁夢縛我根塵

脫未能

孝通貌癯頭銳似老僧後以哭母歐血死梁節庵題碣曰江孝子之墓

燭影闌珊酒滿襟東華露氣夜沈沈

都一處飲大醉

他時重續夢華錄

碧漢紅牆縹緲心

歲月堂堂拋我去可堪宦學兩無成  
媿無尺寸救時難喫飯讀書  
虛此生

附錄任甫見贈湘月詞一闋

吾鄉奇士數鄧梁以後幾人健者雨打風吹餘子盡似汝此才今  
寡鐵骨酣霜繡腸織月簫劍雙無價酒闌對我二豪情態如畫只  
恨犖犖頭顱顛顛髀肉不了山靈詫趁著湖山殘照在儘汝秋魂  
姚冶叢社鬼謀原祠天問莫管興亡話一尊壽汝先生扶醉歸也

自題象峯歸趣圖用江孝通韻

圖爲江孝通畫梁任甫題款時由通州船赴

津乙未三月也

背山面海邨成環桑塍鱗櫛南沙灣圭峯嵐翠相揖讓厓門潮汐  
時往還漁山樵水無阻礙桃源何必非人間豬魚肥腩蝦蜆賤春  
社屠狗牛蹄殷蠶月機聲出深巷繰絲浴繭羅鄺園雨簑雲屨青  
布韞風俗醇樸無嘲訕有田不歸胡蠹蠹三年衣袂京塵黯晨晞

夜暗竟何補乾跳坤踔生多艱鬻田質宅擲虛牝抱牘畫諾汚朝  
班忍爲太倉添雀鼠枝官便請從余刪去年遼海氣滲黷鷹瞵狼  
睖紛梟矚飢虎獻媚強飼肉屈腰撓臆驕豺獍漫搏牛蠹破蟣蝨  
敢以硝黃投羸孱十羊九牧適擾擾一棲兩雄常噸噸毒蛇螫指  
抽刃斷痛定回思捫殘癥兀天颶浪丹石觸收帆轉柁爭灑灘日  
碑留漢有心者對我政府砭疲癱三千年來神聖胄不應貧弱淪  
黑蠻反令外人憂中國諸公兢兢當何顏爬羅新法亦皮傳人材  
皆竄無雄姦我生徧急坐愁歎中宵羈緒長鰥鰥白水棉湖有宿  
約苦爲六鑿相牽扳逝將手版投丞相酥醪訪道羅浮山  
張雨室同年貽酥醪觀度牒道號永高達官例作掛冠語吾出幽憤寧欺謾行年三十  
圖歸隱腰腹空大眞疏頑藝瓜種菜畢吾事頽然天放無拘閑妻  
子督耕象峯隴鑿鋤白柄誅榛菅芋魁飯豆老瓦缶高堂雞黍供

寒慳屋前芭蕉三百樹屋後雜花紅爛斑日長晝靜讀書倦欹枕  
風瀑聞淙潺長林豐草縱孤往羈猿長脫金油環整頓乾坤望吾  
黨天狗睖睖狼弧彎

附程淑人盥薇閣詩

招隱一首

黃鵠搏秋鷹颺颺噬蒼兕車轍拒螳螂泰山撼螻蟻男兒尙意  
氣作直羞撓飢不爲孔光生寧爲朱雲死拚擲澶淵注深懷魯  
連恥伏哭端禮門投書延恩匭咄咄上方劍權姦魄已褫噫彼  
薰天勢誤國麻子李羽翼連宮掖孩穉弄天子闢冗充將帥朝貴  
承風旨霾霧昏東瀛鯨鯢愁失水天變內監傳海嘯軍壘圯張寇  
脅款議內外煽姦宄輸金二百兆割地千餘里哀哀遼臺民棄之  
如敝屣押榜李尙書

指李高陽鴻藻

低首亦唯唯何物崛疆兒立仗

口妄哆彈糾本長官兵部尚書軍機大臣孫毓汶公卿變色起兵曹多義烈  
兩朝三奇士楊錢劾嚴魏大節相鼎峙幸免廷杖辱衣冠罪東  
市謫戍玉關去傷哉安御史叔季搢紳獄多從文字始挂冠歸  
乎來仕官桎梏耳衲鑿不相容君子式夷已家有負郭田何爲  
戀青紫我鑒伯宗妻寧學女嬃鄙且寄招隱辭秋風蓴鱸美

題象峯圖

有山有水小桃源耕讀還堪課子孫認取泊鄒崖下路半帆烟雨  
下江門

充隱何須定買山宣南種菜一官閒秋風吹醒東華夢飛墮羅浮  
紫翠間

北沙秧稜接南沙

馬寧鄉有南沙北沙海心沙

六枳麕籬是妾家檢點舊時

封事藁淚痕彈上海棠花

時寓魏闢胡同簷前海棠高丈餘



兩頃村田何處辦商量歸業轉愁君宦情已作風中絮生計還如  
雨後雲

程淑人未歸時從父執謝晚農蘇樸洲兩先生學詩余年十五以水仙花詩爲紅葉焉

### 附錄康長素順德二直歌

美兵部主事何藻翔禮部主事羅鳳華聯名抗疏劾

軍機大臣孫毓汶上和議也

君不見諫草之堂何巍巍三百年來過者頭皆低古藤書屋何鬱鬱  
鬱中有椒山人不識分宜不過佞臣耳不斬國事無損益豈如賣  
國賊不斬割地無終極朱雲已矣孔融死誰歟請劍申憤抑咄哉  
吾鄉兵部何藻翔華嶽峯尖金晶光巖電爛爛夜騰霜抗疏斬奸  
劍吐鋌同志禮曹羅鳳華義填胸臆照紅霞皂雕蒼鷹比翼出追  
逐無禮憤氣加首請遷都定國是次請拒日絕使槎末請斬佞論  
鞞韜存亡繫此誰開牙事雖不成壯人氣蹴踏雷電飛風沙昔何  
維柏劾嚴嵩萬衆拈香羣歎嗟今者生見胡邦衡對面不識或揄

擲作詩告凡百君子不式紫藤僊館焚香椒山遺宅何爲耶

梁啓超謹案此事主之者實何君翹高字梅夏志行芳潔二十年來朝士罕見其比孫毓汶當國黷貨之風驟長國事敗壞實由於此甲午難作朝野咸集矢合肥而毓汶方炙手可熱莫之敢指君此疏實輿論之導故先生美之

宮扇 爲文學士廷式作

宮扇泥金艷體詩曾經睿賞問昭儀  
玉堂元白今才子朱邸英娥舊教師  
關節無私傳狗監文章有價借蛾眉  
碧山學士清流禍黑塞將軍黨籍碑

御史楊崇伊奏參辭連志鈍謫戍烏雅蘇臺並查封強學會

贈別張大舍人同年 懋伯

看花躍馬去年事贈畫留詩他日思  
海外功名成破甑 時將赴金山領  
事任以其叔奎垣軍門喪不果行浙東風雨送靈旗只今惘惘向何處莫便堂

堂負夙期

象山云不識一字須還我堂堂做人常以此語勸憇伯

若過棲霞山下路

一尊爲醺岳侯祠

附記辛亥憇伯在駐美使任內各駐使聯電逼遜位獨不簽名洪憲時委充參議院力辭庶不愧堂堂者

羅敷吟贈曾三

時試總署章京某侍郎招羅之不肯見也

使君自有婦羅敷自有夫  
萑苳生鼠壤不願移河洳  
促織巢桑下不願籠紗幘  
妾身習絺素羞著丹霞襦  
妾髮稀膏沐難綴明月珠  
妾口甘蔬韭作惡牻牛腴  
所惜千金價燕市買康瓠  
粉黛妝鹽嫫狼籍畫眉污  
侯門羅佳麗左右調笙竽  
含睇丹山臺使君足歡娛  
咄咄登徒子偏愛酒家胡  
才人嫁廝養實命心不渝  
箕帚蒙巾幘香火爭趨諛  
豈無求福情徒招鬼揶揄  
開我青鸞鏡孤潔明區區  
各自愛其寶持謝執金吾



蓮華寺夜起

酒渴四更醒  
攜燈汲井華  
朦朧松月下  
踏損露葵芽

畸士

畸士不可用  
用之覆大清  
畸士不可殺  
殺之成大名  
不是曹孟德  
不容禰正平  
不是何心隱  
不知張江陵  
翩翩翔冥鴻  
濺濺縱海鯨  
讀岡千仞萬  
國史記戲題

英蘭教典只方言  
蠻語何如國語尊  
蚊脚蟹行粗解識  
籐鞭手杖託輜軒

使臣近多用譯員

黑衣太子白衣王  
南北單于本一疆  
四百年來婚媾禍  
茫茫海峽血玄黃

英法世讐有事則協以謀我

北兵眯目雪飛陰  
乞食荒山獨抱琴  
紅白薔薇花落盡  
宮門風雨晝沉沉

苦是鴉眠大教徒露頭赤脚布衣麤跨驢踏破歐洲路十字縱橫

磔殺圖

清教徒堅苦自媿儒儒

創世金人獨祭天周妻何肉不妨禪馬槽悟得空離旨

日本僧空海離

鸞不禁娶妻食肉

十誠還應遍大千

耶教若不禁拜木偶信徒更衆矣

紅雲火柱照迦南沙漠茫茫卓錫潭到底不離神鬼事天堂地獄

日喃喃

西教迷信甚於拜木偶

魯華宮殿劫灰殘石柱蟠虬大可汗血肉橫飛油畫院至今流涕

說師丹

甲午威海旅順海軍殲沒當人油畫院

旗槍百萬付東流病渴盧仝死不休花債白門鶯粟索教人羞殺

十三州

美國投茶於海離英獨立頗類焚鴉片案

懸軍深入亞尼河雪窖天荒馬斃多二十萬軍齊覆沒更無人睨

墨斯科

將軍傳粉態嬌嬈面醕桃花怕雨消若遇錦帆銀櫓隊投鞭卸甲  
各魂銷 五餌不廢女戒也

江山秀弱文章好士女粗豪血性多希臘詩詞妙天下至今故國  
黍離歌

天草當年起義師薩摩再敗悔攘夷燕雲十萬橫磨劍此亦神州  
鎖港期 庚子拳匪亂野蠻極軌與日本天草攘夷相類

爲潘幼執題畫美人

琴心劍魄兩蹉跎雙膝蒲團熱淚多流落風塵猶未嫁阿儂夫婿  
是支那 用列子思嫁於衛意非羅蘭夫人語也英將古勒納與余言支那古瓷即我妻西人於最親  
愛者每喻以夫妻

庚子六七月間圍城中雜感

畿輔纏妖氣焚香夜數驚 義和拳夜呼市民燒香鬼氣陰森 刻桃能厭鬼撒

豆笑成兵斗米天魔奉篝狐夜火鳴此身非我有寄子固安城

曜儀寄固安友家自爲死計

十萬橫磨劍神鋒恨倒持竟成鸚鵡識應誦鵲鵲詩天將呼難到  
王孫哀已遲開元太平日樂譜讀龜茲

端王莊王流言今上爲耶教主拳匪入宮

借搜教謀逆事幸不成

作事使人疑將軍乃死之聶士成率軍護鐵路拳匪誣通敵朝旨切責憤甚飲大醉策馬

赴敵死母子被拳匪縛去傷心白頭母乞命黃口兒督戰煩朝旨橫馳入

敵師大沽臺昨失只見聶軍旗

噴血畫門牆壇焚黃表颺橫刀三輔市籌國半閒堂覆轍東瀛戰

御前會議上曰中日之役一國且不能戰何況九國許景澄汝在外洋多年何無一語因以手牽許袖許略

言兵端宜審慎端王怒斥許攀上膝聒絮無禮立山曰洋人雖暴亦講理端曰立山謂洋人講理請派立

山去講袁昶欲有啓奏溥頤起立村語囁嚅聞散焚香北斗禳皇后夜禳諫梁仍不悟

六月苦飛霜

昔時樽俎地 夜夜起風雷  
枉殺回圖使 中興宿羽臺  
羈囚蘇武節 排難魯連才

徐用儀聯芳奉命赴津欸議阻不能行

止戰唯宸斷 文華瑣闥開

一卷兔園冊 日鈔東西銘  
尊攘尙絮絮 妖孽豈冥冥

徐桐崇綺言以此

亡國亡得光明磊落 信盜事容有交鄰  
理無徵五洲夸誕耳 鄒衍無稽聽  
瀾公詢袁爽秋津滬外西洋尙有多少人可笑可憤

亦有棄官逃 攔街禽二毛

時謂教民爲二毛子

衣冠牛馬賤 風雨鼠狐

噪禹步揮神劍 橫行舞大刀  
笑儂阮囊盡一命 等螻蟻

奉家君諭不許

出國門一步

變姓神仙尉

京官變名姓撤銜牌懸白旗秋風犢鼻褌 鞭笞同皂隸

翰林院某

被擄充苦工

搜索到雞豚 馬糞荒裴墅  
氍毹盧占謝墩 西華珠玉盡勳

舊幾家存

螫手蟒蜂毒流言起懿親燒城唯赤舌保國有金輪白馬歸藩第  
青鸞問使臣荃蓀芳可佩未敢怨靈均

親貴謠言慶王通敵至是奉命入京議和

支頤疑夢幻天半照神燈國事眞兒戲官衙占惡僧朔風吹倦羽落月

曬枯藤欲睡不成醉銀壺酒已冰

義和團娘子軍名紅燈照即廣東中秋節兒戲之孔明燈

落葉臙脂井秋心似轆轤風鈴驚露索月影吠猧奴噩夢猜鸚鵡

芳思訴鷓鴣曉妝倭髻亂心事託檇蒲

聯軍派兵守景運門不許出入宮人有懼

禍自盡者

三百年天下安危在此行有懷唯國難未敢惜身名倉卒開邊釁

艱虞屬老成一生和戰史功罪後人評

李相奉命入京議和遲遲未到

歷歷圓明劫滄桑四十年黃楊逢厄閏土木化雲烟尚憶開皇寺

俄開主客筵

咸豐庚申之役十日和議成

西園今宿草

恭邸於甲午後罷軍機開廢十

年至去歲復出數月薨於位瞻望益潸然



送程輦儒李苾如崔芝雲同年下第南歸

憔悴春光中酒情  
杏花飛盡柳花輕  
十年燈火訶林夢  
三月津橋杜宇聲

時因中日戰事天津戒嚴

盧橘黃時過歇浦  
荔枝紅後到佗城  
傷春傷別兼傷亂  
漫向江湖訴不平

七月十六日感事

同羅筱豪作

六甲玄符下紫清  
宣和北伐太無名  
豈徒蠻瘴臨江府

殺許袁徐聯捕

黃思永入莊王府誣戮白蓮教數百人

可憶青衣五國城

七月十六日徐桐董福祥召見

議西狩力持殉社稷說

海外文章成黨錮

禍源戊戌變政淮南方技好談兵

大

阿哥溥雋立余告伍叔傑曰禍不遠矣不意其發之暴也

玉津園外先惆悵  
碧血滯滯

入敵營

嘻嘻祆廟委煨塵  
景教西行許大秦

日焚教堂條約固許保護也兩界河山

仍黑劫一朝忠義是黃巾

白晝殺人放火剛毅稱爲義民翠微遺句悲誅錯



韓侂胄不足惜如宗社何宋華岳翠微南征錄有誅錯句見四庫提要 內史名言憶降莘日  
誦妖由人興數語不爲旱荒寧至此畿南赤地盡飢民

七月二十七日得西狩消息

翠華聞道出居庸 外城五日不得內廷消息 河嶽風雲護六龍 苜蓿萬家

燕市馬觚稜一點薊門烽淒涼夜半滹沱飯 上至易州始得食 寥落秋

深景運鐘 聯軍分守景運門 宰相遙充祈請使都堂談笑酒千鐘

題漁樵清話圖 代友作

某山某水儘逍遙巢許終當感聖朝海澨山陬租借盡更無餘地  
著漁樵

祭太陽

煙草萋迷六女塘二王遺事說紅羊村孃不識煤山恨白酒黃鷄  
祭太陽 吾鄉婦女三月十九日結金花會以鷄酒祭太陽相沿二百年莫知爲煤山事蓋日乃君象

也

### 秘殿二首

十年不召老尚書秘殿傷心論建儲先帝舊臣幾人在慈寧賜食  
撤銀魚

第三句太后語

菊兒衙口車班班半夜宮燈照往還只說老臣不奉詔朝球撕斷  
詈文山

附記徐蔭軒相國壬午座主也自宏德殿行走余憤脫門生籍庚子殉難後樸員外壽向余述軼事云徐相不召見近十年已亥十月入直太后忽賜食撤御筵銀魚火鍋賞之食訖入謝慰勞備至語及穆宗事因垂泣曰皇帝不能生育穆宗不可無後徐曰皇上生育宮壺事臣不能知太后復曰穆宗終不可無後徐亂以他語太后默然而退某夕內監傳太后旨令徐中堂到菊花胡同榮中堂宅有大事會議徐至崇綺在座述太后意語廢立徐曰老臣不敢與聞榮曰我亦跟著老世叔走榮素稱徐老世叔也徐即呼輿歸入門憤憤頓足撕朝珠斷曰崇文山荒謬極荒謬極家人不敢問越數日門生御史楊崇伊請見辭以將

睡楊告有大事堅請見坐甫定從靴裏掏出摺稿徐閱未半曰我勸你不可如此荒唐蓋請廢立也舉茶送客楊出門車後載氈被徐家人尾之向定王府大街去矣知宏德殿行走非徐意也備記之以誌吾過時庚子十二月也樸仁山任福州將軍辛亥殉難

### 寄懷梁任甫

五年書問渺迦陵

梁小僕慧潔戲以迦陵鳥呼之

心事那堪問飲冰二十五

番山下町櫻花簾外校書燈

萬木山堂柳十圍梁鴻海外幾時歸勸君莫話宮廷事

每讀清議報輒

憶韓安國對武安侯語

三百年纔有是非

木葉山頭鳳有雛

聞李慈園師塞外得子

賜環倘見老尚書升沉此外渾

閒事風雪龍庭淚滿裾

### 哭黃公度京卿

一場恩怨蝗蝻錄半世功名薏苡珠

丙申議放駐英使臣將奏之夕赫德到總署

誣公任星加坡領事有贖私事英未必接待翌日奏上改放駐德使臣旋坡領案查覆辨白英使已釋然而德使聞英初有煩言踰月始告總署願接待隱要挾租借膠州公憤不赴德改放湖南鹽道身後未

除鉤黨籍獄中寧有自陳書

戊戌黨獄作公在上海逮捕獄未成遂廢棄

他年倘爲蒼生起今日益傷吾道孤地下若逢楊侍讀除書曾到

九原無

時詔赦戊戌黨人楊叔嶠死後余屢夢見之相持痛哭而醒

潛焉出涕睠同舟橐筆東瀛有隱憂

沈子培語余日本國志早刻十五年不至有

甲午之敗則公度搗謙之過也

漢志十篇誰纂續可憐無命作譙周

笑嘲風月容聲叟跌宕江湖作幸民畢竟聖朝文網闊烏臺詩獄又何人

牖下尋思亦國恩逋臣況有未招魂飄零海外歸無日贏得中原  
七尺墳

入都五日三訪予

叶仄自言說項梁任甫北海風流今寂寥

癸卯

服闋入都當道如翁常熟張樵野以虛聲取士者亦不可得 死抱幽蘭淚如雨

汰弱難逃天演例涅槃未了衆生緣靈魂不死轉輪去又作人間  
新少年

附錄公度己亥見懷作

相約乘槎萬里遙天風吹散各蓬飄屋梁月黑思君夜忽夢平

生吳鐵喬

使英時約充參贊

王員外仲午用東坡蕭監倉韻見贈率此奉答

五噫歌成廡下梁漫從司命薦椒漿鸞皇有道巢阿閣雀鼠何心  
耗太倉尚有宦情如茗苦忽驚鄉夢覺橙香蹉跎十載猶樗散雨  
立憑嘲榼楯郎

開春十日九陰霾習靜年來學艮齋薄宦偶隨花墮溷素心未變  
橘踰淮瓶梅半吐蜂窺幕簷雪初殘鳥下堦冷落襟情君與我寒

籐怪石倚蒼崖

仲午後用前韻見寄因再和之

恨無筆札給游梁市隱金臺託賣漿道藝根原通孔墨文章憂患  
始沮倉閒拈黑豆尋人譜獨爲蒼生上佛香同里已知無狗監子  
雲自分老爲郎

東風乞借洗春霾自擷寒蔬供晚齋下吏襟懷無魏晉中興人物  
數湘淮奴催飯熟還看畫客送書來偶下堦禪榻鬢絲吾老矣一  
枝芳訊寄朱崖

題漁樵清話圖

黯黯京塵髻已斑故鄉辜負好湖山輪蹄可奈磨人老猿鶴應教  
笑我頑一蓋白雲靈隱路半篙流水段橋灣此生未遂漁樵願讀  
畫憑偷半日閑



新翻琴譜託微詞雲水蒼茫遲所思悟徹六如蘇玉局續編十詠  
陸天隨春秋耕讀還兼課魏晉滄桑了不知簑袂笠簷先準備棲  
眞何日結茅茨

星坡船上見赴荷蘭華工惻然口占

丙午

瓦盆草席苧衣單醃菜乾魚飯一簞莫纂黑奴顚天錄牧豬兒有  
甲必

叶平

丹

某京卿微時鬻身豬奴擢甲必丹

使節初聞到荷蘭  
新派荷使陸徵祥  
百年喜見漢衣冠輸邊百萬咄嗟  
辦海外於今覓食難

聞海客談詔旨保護回國華僑有感

少年無賴走南洋海禁森嚴詔捕亡白髮重談嘉道事田園無地  
感滄桑

七月十二夜過婆羅洲海峽贈船主



月黑天陰渡海腰婆羅洲外五更潮白頭浪打舵樓過風雨篝燈立鐵橋

檳榔嶼雜詠

五月星洲舶棹歸開春 以陰歷五六月爲開春雨最多 天氣雨霏霏胡椒

葉江干路芒果熟黃魚正肥 芒果魚以芒果熟時登市最肥嫩味似鱒魚而少刺

合是前身張黑女茜裙窄地影翩鴻珠題金鈕衝涼屣口嚼檳榔

去食風 巫來由女以黑爲美頭挂白涼布別饒風趣晚浴曰衝涼河濱晚步曰食風木屐飾以珠玉

此間樂已不思蜀海外桃源宜子孫 檳榔嶼山明水秀氣象靜穆海外桃源也金

字榜門方伯第 閩粵鉅商甲第雲連門榜方伯第榮祿第 紅毛丹 果名 熟滿山

園 山園十數畝環峙蔬果紅毛丹似荔枝而多刺

自別唐山 華僑稱本國曰唐山 兩鬢霜衣冠未改 華僑娶巫來由婦生子女不解

華語而猶唐裝 土音忘勸君莫喫留連子 味甜而臭惡初食下咽輒作嘔久客南洋者

酷嗜之俗謂喫之令人流連忘返富貴他年歸故鄉

極樂寺華僑鳩建爲游讌地康長素題

榜曰勿忘祖國

### 夜泊恒河口待帶水船書所見

橫海東風吹浪顛  
桅燈明滅亂流船  
腳緣鐵鎖猿盤上  
人命黑奴不值錢

### 印度海口

灣迴岸轉氣龍葱  
七十二沽形勢同  
無量恒沙無量劫  
夕陽遺甃

故王宮

英墟印度囚土王于此與藏官揶揄布倫來遊談遺事爲泫然

### 大吉嶺火車上聞印人夜歌

車行月明中  
風露夜悽緊  
四山悄無語  
千里迅俄頃  
度橋葦荻響  
越堤林樾影  
鈴鐸時一鳴  
燈電碧淒冷  
忽聞楚歌聲  
隨風出遙嶺  
一轉一迴腸  
哀哀天帝請  
悽然亡國音  
蒼涼淚如綆  
變徵忽歌燕

騷些託哀郢喚起國民魂中夜倏猛省餘音黯欲斷夢入荒寒境  
神思闇惛惛推窻望參井野田雙白鷺飛上巖松頂極意摹杜工部玉華  
宮細閱之乃類陸放翁夜起煎茶作

自大吉嶺入哲孟雄部馬上口占

漠北峯巒萬馬奔

山脈自阿爾泰山蜿蜒而來西金鎖鑰控烏孫

光緒十六年英

佔西金築碉堡防俄

漫山嵐湧雲成海

四山雲氣冥濛俯視如海

驚瀑雷鳴石

有門

瀑布數道出西金匯成踢土他河英人因崖石築閘設獨木橋泰華一丸伸右臂五

嶽皆起脈於喜馬拉山江河兩派入中原

黃河揚子江竝濫觴西藏山澗之水演漾而成鉅

流恒沙無量胡僧劫興廢何因問世尊

西金即阿育王降生地佛名奪顛佛教徒至今尙衆去年英太子至印議收回奪顛佛地事請西藏班禪

爲印屬黃教長哲孟雄王副之其謀詭矣

嘉倫綳道中聞爆石聲口占

荒山有至寶山脉都鑿斷砰然地雷聲知采金剛鑽玉龍鱗甲滿  
天飛風雨夜聞山鬼怨

石塘遇雨

離噶倫綳六十里

轉馬出松頂半山吹橫雨咫尺不見人但聞雲裏語

咱利山脊勘哲藏界

龍頭咱利兩山連綹爲印藏門戶有一夫當關萬夫莫開之概

龍頭天險界碑磨

龍頭山已爲英佔據

部落華離越卡多南北礪泉流

不定

哲藏以墨竹河南北流分界雨中立馬望恒河

竹筴道中

在布丹西南毗連春丕地和煖禾麥暢茂英人以爲佔領春丕後可以賤價向

布丹購地聯成一片大陸

登巘參天入布丹竹筴頭目獻蔬盤

日獸牛羊肉得葡萄椰菜如飲仙露嵌巖

三五杉皮屋

自西金至此土人以木皮爲屋無磚瓦

木客山都趁地難

蠻婦席草

地設布攤

附記 光緒戊申正月英員惠德韋理敦挾兵入布丹冊立布王余電外部擬援帕米爾邊界頭目

由中俄同冊封保護案向英理論外部不答布丹非我有矣

### 多打塘即事

野鴿巢雲多似蟻 白鴿巢山洞數千萬窟蔽日 蹇驢喘月瘦於柴 山高空氣

不足呼吸故人獸皆喘 紅裙白帕巴塘女 藏女頭罩白絹哈達窄地腰鼓以腳踏地歌舞自

成節奏 腰鼓搖鈴踏綉鞋

### 帕克里即目

翅如車輪眼如火霜鵬人立驀驚馬 藏俗天葬野鵬食人肉肥黑睛赤 廢碕

荒磧無人烟三日盤旋雪山下

自客木湖至白地以百金乞寺僧沿湖種柳

他年十萬何郎柳兩岸陰環客木湖補入三招圖畫裏谿山可似白隄無

巴孜道上

七里陰林不見日馬蹄踏石苦聲  
确鳴鳴忽作嬰兒啼點猴擲李  
打人幘

唐那山口

喜馬峯頭作重九四千年來得未有

循諸莫拉利雪山麓西行地球第五高山也

遠望伊威利士錫山康眞張客山皆在日中爲地球第二高山壯遊應在玄奘前山賊不

居靈運後

中國人由印入藏者自光緒五年滇商楊怡興始十九年何長榮議約大吉嶺惜均無

路程日記咳唾落地成江河蜿蜒五嶽皆培塿地平綫已沒西極天樞

夜不見北斗

入藏後不見北斗

凌晨雲氣排海出白晝怪風吹石走

午

後時有怪風人馬吹倒數里外

百道飛泉出樹杪白沙銀礫聲細吼盤渦激

闌石凹深古磳斷冰鐵寸厚壞礪榛莽竄狐兔陰巖燐骨飼鷹狗

英軍入藏戰骨狼藉

中亞屋瓚天下脊北徼屏障土囊口白頭胡賈出



波斯歐亞孔道通樞紐指阿里天竺迤北葱嶺東宗教佛回居八九  
神奈山頭十字軍蒼頭突起破枷杻吁嗟乎二十世紀世界秘密  
國中原鼾睡無人守多少地學探險家足跡未到天窺牖自十六世

紀英俄法探藏者凡十一人到藏邊者僅五人現英地學探險會派瑞士人司芬海定從新疆入後藏納爾倉測探屢被土人困拒我來一萬六千尺雪山森峙驚奇陡巖腹雷火

燒僵松石罅人臂攫枯柳斜緣險仄不容脚下瞰巉嶽敢回首磨  
驢旋轉蛇盤上東歪西倒誰援手十步九喘竹筒吹倚樹小憩立  
難久下坡勢比上坡險石破馬腹人折肘山頂湖迴數十里野覺  
黃白成淵藪魔鬼刻石貌猙獰馬蜞嘔人血盈缶黃昏初投喇嘛  
寺黧面皴裂驚奇醜魯莊嚴繡佛龕寺僧以佛龕爲余臥榻以古錦爲壁衣下敷毯數重且喫酥茶飲蠻酒酥茶以釀茶和牛油入竹筒千百杵成濃汁蠻酒以青稞釀成白漿味酸澀



哲孟雄山中與英警官荷遮士全醫士希聖並馬攀談因雜  
錄其語却贈

住山三十年雙瞳印萬綠因疑所居遊唯應蓄草木昨偶入城市  
樓觀霄漢矗紅塔黃欄干有若芒刺目終歲無過客趑然到空谷  
偶然聞剝啄不必問生熟一面信前緣數談成骨肉茫茫人海中  
相識渺一粟亦有英蘭人與我同邦族來往輒參商無緣一接觸  
傾蓋無幾人爲歡日不足安忍因小故反顏相怨讎肺腑生戈矛  
詛人適自毒桃偶當相憐蛩蟹各相逐以我處寂寥交寡情逾篤  
連日並轡遊幸獲傾欵曲況有杯酒懽寧止桑下宿馬上談邊事  
亦互詢土俗大吉嶺居民生計在種竹歸途儻再經會面安可卜  
送君更一驛握手晚安祝

三十年故有此覺

自起處至桑下宿皆紀荷遮士語思想頗新可作谷風讀住山

色拉寺晚望 在拉薩北寺僧三千餘人與別蚌寺甘丹寺並稱三大寺

三千五寺塔黃紅六十八城煙雨中欲訪康乾舊碑碣老僧遺事

說雙忠 雙忠祠在寵斯岡朱爾墨特之亂傳拉二公殉難藏人立廟祀之曰雙忠祠

### 萬佛巖題石

那將熱淚惜年芳草棘蒙龍度石梁馬上忽驚湖鴨起夕陽人影

落山塘 藏人愚而多疑似之

### 示藏僧

乾隆初葉唐古特戶口百八十萬今存百三十萬喇嘛之衆亦一原因也昔日本僧空海離鸞改定僧律不禁蓄髮娶妻食肉一時推廣大教主遂成富庶業嘗標此義告噶拉丹池巴期期以爲不可攷印度史釋迦十六歲娶首布羅馱那國王女耶素陀羅爲妻後出家悟道足爲佛教不禁嫁娶之證

周妻何肉不妨禪微笑拈花袒右肩佛法度人還自度癡男怨女  
總生天

夜闌燭爇問陀羅嚼蠟橫陳悟道多不似野狐魔障墜私將戒體壞阿難

生子當爲舍利弗生女當作比丘尼不有衆生安有佛我聞法喜以爲妻

赤足參禪白布妃 白布國王女爲贊普妃與文成公主同參淨業塑像大招是空是色見天機春風吹綠柳林子 藏官於拉薩闢園數十畝徧植柳名曰柳林子爲銷夏地蛱蝶雙雙自在飛

### 附記

初入藏發善後問題二十四條交兩上三大寺會議末條即本此義駐藏大臣聯豫密電奏參誣以勒喇嘛還俗改西裝恐操切激變等語因余參戚晚駐藏大臣有秦案圖傾陷也有秦號夢琴慈禧太后侄與余同官兵部武選司放駐藏大臣入覲太后賜銀券三千兩治裝此次入藏夢琴向余述其事併詢同寮近狀然屬私狼藉負國殃民余不能以私廢公也原參摺罰追贓欸五萬樞旨譴戍新疆余往送行夢琴

曰畢竟天恩高厚到新疆數月贖款數千放還都下相見再痛飲於萬福居也

### 藥王山題石

頽崖削鯨額陂陀覆龜背綫徑蛇蟠上草樹荒蔚蒼驟雨澗泉落  
曲折赴奔會荒塘稍渟蓄山田資灌溉巖翠滴岸柳谿綠入畦菜  
湖鴨浴沙嘴塔鈴語雲外冒險步却穩高立見始大闢變觸悲觀  
獵微忘靜對恣探轉成貪久憩恐生愛聽泉淨耳根看雲悟世態  
迴首五天竺驚嶺忽破碎保國無金輪如來有興廢江山倏古今  
傷心唯湛輩

### 札什城

去拉薩十餘里乾隆時藏臣署在此

藥王山下弄春晴鉞斧跳歸札什城

藏俗元旦童男女花衣假面具爲魔怪百戲

名跳鉞斧

屋脊竿幡燈似海夜深唯有木魚聲

上元節唐公主生日家家屋頂

懸燈誦經

攢招

不生西土亦生天贏得摩頭抱脚緣青海王公施十萬攢招還乞  
半文錢

半錢

蒙古王公赴藏攢招布施鉅萬獻金珠乞達賴摩頂或吮佛脚以爲幸福他人攢招亦住乞

鄒崖遺稿卷二

順德何藻翔高著

閨情

葱手搓香捻糴粿

黑麥磨粉名糴粿藏俗以糴粿和酥茶手捻作飯銀壺滴乳獻酥茶

富家以銀壺玉碗盛酥茶獻客

喃喃宣佛金輪轉

無論男女老幼手持金輪傘日夜千萬轉

轉一輪作誦經一徧佛家爲不識字者開方便法門也生子他年大喇嘛

以綠松石小屏供佛大招寺泫然有感

磨盤山頭夜隕星  
鏗然成石松綠屏  
眉黛點點中瓏玲  
千年巖璞雲閉扃  
山靈呵護烟冥冥  
匠石驚眩搜圖形  
貓兒眼碧鴉頭青  
雲母屏開翡翠翎  
桐魚細扣聲玲玎  
銅綠斑駁新磨礪  
石骨堅緻難鐫銘  
東坡玉帶吾前型  
山門留壓光晶熒  
神教忽感雍和瓶  
文成遺履閱千齡

藏人幞頭仿公主履造妝樓香火供始娉

寺後有文成公主妝樓啐經



處昭陵石馬荒郊垌唐家天子愛黃庭唐公主愛佛經吁嗟乎

漢番兩戒判渭涇至今中原柱下毒霧晝冥冥時論以中國受老毒西藏受

佛毒金銀法輪天西寧淨土一片佛有靈夜叉羅刹驚奔霆鞭刀

帕首吹臙腥龍頭山名印藏第一門戶天險開五丁西金鷹旗屋建瓴

恒河牛皮風揚舲藏人以牛皮爲船以竹木支四柱活佛北走漚散萍我來

憑弔涕欲零沈沈大招雙柳聽寺前有公主手植柳二株丹珠梵唄戎服

聽白晝靈飆吹塔鈴

### 哭丁徵君叔雅

坐脫僧伽月半宵單衾孤館儘蕭條君在潮州館倚烏皮几坐化夜半腰篋促余

至始共扶置板牀上蒙以半衾一寒遂死陳無己去冬不裘不爐剛甫屢規之曰死亦何必

學陳後山不聽卒以中寒死自序頗同劉孝標君不得於其室飄蕩江湖十年朱嚼羈

魂終兩絕余屢勸南歸不果行絳雲舊錄半烟消持靜齋藏書聞亦不守海王



村亦西州路碎器何心問董窰

談青花瓷又弱一箇矣

南國朱鸞處士多百年風雅數潘

孺老

羅雪谷

應知別有傷心事

可是不求聞達科

科舉徵辟均不赴

蘭蕙花針皆自幻

富貴生死作如是觀

木瓜瓢子問頭陀

勲業文章那裏得知

我知成佛輸靈運人種空遺喚

奈何

東半球開闢五千年西半球發見纔三百餘載想山河大地當時必遭灰劫余嘗演閻浮提種

人之說君深信其然且援證甚博

### 寄贈梁節菴

廉訪

一夜風雷震九閭天狐避座已驚魂那將謝表陳封事

傳旨申飭甫

見龐髯動至尊

召見面勅慶王

臣以直傳寧國福官容病免亦天恩東

南物望朱

蓉生

陳伯潛好風節文章許並論

### 瑤池三首

十日瑤池獻壽卮微霜碧損露桃枝單車夜到菩提谷脈案初聞

## 進御醫

十二月初十日太后萬壽自初一日起內宴傳戲太后年高過勞患滯下初七晨郎中保恒入直出語余曰太后不豫推班五天十二日午召見慶王著速往普陀谷視陵工當時尚未聞上病也十五日各部院始奉皇上脈案內監傳言太后略瘳皇上欠安十七日外交部急電促慶王回京十八午農工商部鑾儀衛瞭櫜向例國郵後始開此庫都下人言籍籍十九晨總憲張英麟白袍至西苑門爲禁衛軍呵斥去二十晚乃奉大行詔

太白橫飛入紫清風簾燭影望分明外人強說宮中事夜半誰聞索蜜聲

癡絕孔光車上語光緒三十三年張袁同日擢樞垣伍編修叔葆迓張保定火車中張屏人移坐蹙眉密語曰外間近有何議論纂弑事我豈能爲卅年開府一書生劉公若在無今日已亥謀廢立劉忠誠獨持正義淚盡攀髯憶老成

贈翠微山龍王堂海覺禪師

六月十四日宿此

覺師勸我去爲僧夜與師說圓覺經師謂余有根器汨於富貴可惜我亦曹溪棒喝  
曾天地何情霜後葉河山不定塔中燈師爲死生大義二句渾括其語意著  
衣喫飯無非道擔水搬柴病未能尙憶鐵龍橋下過丹珠殘疏滿  
行滕譯西藏甘珠爾經丹珠爾經二卷未成經用羊皮寫也

贈別叔葆同年鄖陽太守

平山風雅豈堪師位置盧象昇王世貞亦未宜叔保除鄖陽守節庵電賀曰願  
爲盧平王乎叔葆答願作雅雨賓谷耳舊是玉苙詩弟子節庵有玉苙詞斷無疏建

魏公祠用鄖撫梁澤事

伽藍續記爛丹黃時纂燕都伽藍記史藁叢殘五馬裝方修德宗實錄未行

廿載玉堂清俸盡兩肩書畫入鄖陽梁節庵極稱二句議作畫贈叔葆騎驢

晨過秘摩寺攜榼夜登耶律墳二句皆實事此後春秋有佳日松風

閣上便思君

清明自袁大將軍墓過萬柳堂

三百年來冠蓋場元明遺蹟感滄桑

自元明至國初園亭游讌多在崇文門東乾

隆後移宣武門西南地運有盛衰也

松楸尚識督師墓槐柳難尋丞相堂遼瀋

烟霾思將帥

時日俄交關東事日亟欲求如袁將軍其人不可得

康乾風日憶壺觴

歐力東漸風雅道廢士大夫及岌顧景所謂亂世之日促以短也

無端俯仰傷身世弔古

憑今並渺茫

送江御史荇村歸梅陽三首

彈劾頻聞到懿親先朝得罪疏中語問何人廷推未可歸西錄家事

終難預外臣自分莠言誅少卯

諭旨有莠言亂政語

不辭黨籍附安民

椒園我欲焚遺藁慟哭瀛臺淚滿巾

已酉三月余赴察院上請改正戊戌庚子實

錄摺荇村激賞因訂交

陳事風聞許諫垣

奉旨嚴責姦貪證據令明白回奏

臨軒召對況溫言前月召

見慰勉備至 好名未免知臣罪 諭旨有迹近好名語 鐫秩何曾亦國恩 回翰林

院供職亦五品官 母自能貧輕宰相朝無闕事愛邱樊宮廷頗費調停

苦 近日宮中有齟齬事賴慶王調停社鼠不可去 應信移官豈至尊

明朝歸去海雲鄉曲巷榕陰舊草堂七疏頗慚包孝肅 原疏引包拯七

上疏事單車尙召顧涇陽以言報國謀何拙再起還朝鬢已蒼好向

武夷精舍築抽閑且學種茶方

### 訊節菴按察病

臥病那堪客武昌南樓風月儘荒涼陽瘡或免當塗忌 中風舌強左臂

痺痿麻木今無活國方且典琴書供藥裹却緣山水戀桐鄉經心

舊院諸都講問疾還應滿後堂

### 天寧寺懷任甫

塔鈴猶似說郎當挾彈當時馬上郎 乙未秋與江孝通周節生張菊生陳簡持

曾剛甫梁任甫挾柘彈騎馬繞塔環走賭射塔鈴風中丁丁有聲相笑樂

十五年來塵劫夢

鴿泥秋雨冷僧廊

南河泡感舊

一雨洗萬綠蟬聲在高樹風獵蘆葦響小車石橋度萬柄白芙蕖  
照水媚脩嫵瑟瑟碧雲帔葉底花微露靜對覺涼生小立偶香遇  
憑闌捉花蝨掬井滌茶具冰盃剝菱芡土銚煮諸芋時物趣懷新  
園主感非故愴念南皮游楊

叔嶠銳

譚

復生嗣同

溘朝露吳公筱村德

瀟佛理深覆醯寧非數

乙未六月復生招宴於此三人均以橫禍死

捶策彰義門

西州淚如注黯黯天寧鐘白塔斜陽暮

冬夜懷任甫

羈臣海外十三年寥落雙濤託一塵忍餓有天應不死欲歸無國  
始堪憐淚乾滄海填精衛魂斷瀛臺拜杜鵑頗憶茶坑風味否不



堪重讀說橙篇 任甫有說橙篇

附任甫答贈

巖電爛爛何梅夏 南海康先生順德二直歌中語 短髮鬢鬢今似誰白首

爲郎應自笑科頭對客尙能奇年華鶯老花飛後世事圖窮七

見時 述君惠書語意 况復參商不可望沉沉山海只相思 翌年武昌變起

遂成詩識

以舊刻中州集贈任甫媵以一絕

北渡金荃不忍聽中原文獻半凋零一編江介雋談錄收拾人間

野史亭 作詩向不存稿鈔近作數篇付任甫亦他日續中州集資料也

資政院晚歸車上口占和唾庵

宣武城西路絕塵象房橋畔雪如銀蕙蘭或恐成蕭艾鷹犬何曾

變鳳麟慶曆黨人思聖德 是日議開黨禁 元和歲計憫官貧 預算裁官俸鄙



人頗持異議還將唐律參羅馬楊子卮言似不倫  
楊哲子演說新刑律破除家族主義

壽侯官林如山 代阮作

無諸城頭九月九西風吹灑黃花酒東華帳飲送將歸白雲子舍  
樟江口我聞榕菴林封君碧山小徑揚清芬一家慈孝安耕讀大  
臣論薦梯青雲人道隱君有陰德五花誥捧歸娛親先生幼講齊  
民術農家古列九流一民生在勤箴諺逸終歲胼胝髮如漆農書  
欲譯徐光啓水法兼參熊三拔我欲從公學稼圃家無負郭官如  
蠡年來赤縣半榛荒堯湯水旱傷苞稂吉貝來從天竺國香粳多  
出暹邏航安得李悝盡地力 余素主中國盡地種木盡人學槍斃之議 盡驅游  
惰歸耕桑先生行年五十五掀髯一笑氣吞虎丈夫愛國無出處  
呼兒磨刀烹肥粃黃蕉丹荔羅華筵香蛤珠蚶佐春醕武夷君本

出錢籊幔亭笑拉曾玄語

題所藏李子長畫

羅浮第五峯

風雨漫天胡不歸雷光一線暝行微釣竿欲掛鐵橋樹却恐浮山峯夜飛

畫漁父風雨暮歸突兀見羅浮峯一角

附錄鄭蘇堪孝胥題句

世外天留漁者才風簑雨笠去還來黑雲壓頭不敢語響發空山成怒雷

哭譚芸哥

匹馬相從二十年曾隨天竺學參禪歸裝只有羊裘在宣武城南

買墓田

余自入都芸哥即相從性慙直窮苦患難不肯去雖穎士之奴涼水之僕無以過也一夕暴

病死哭之慟賻百金備棺衾

德律風

鈴索忽丁冬何人喚乃公君如傳語蟻我亦應聲蟲千里音塵闕  
九天咳唾風短長飛意外出入總機中寂寞誰能扣希夷已暗窮  
須防牆耳屬却喜谷音通掩目盜鐘笑談禪面壁空隔江三百里  
無事寄郵筒

辛亥九月十九日作

昨夜見微霰檐間棲鳥稀

時有排漢之謠京官紛紛挈眷南下

看雲知道力掃

葉悟天機此亂從何說無家那更歸

是日粵再獨立見人論盜道

胡維

德曹汝霖陳懋鼎顏惠慶等在外務部鄭嘉來議承認葡新政府摺倡言葡主遜位是中國好榜樣

尙

憶故山薇

登臺一首寄麥孝廉孺博

四更不能寐登臺望天狗睽睽齊豫郊掉尾犯北斗缺月隱高樹  
疏風拜殘柳秋園梨棗熟黠猴偷八九猛拍石闌干驚越鄰牆走

見除日喜蟄庵除官有贈

薄宦不妨員外老詩人端與右丞宜  
它日中郎題墓石頭銜猶是舊官兒

雜感

殺氣滿天地龍蛇起漢陽  
狐鳴推夥涉魚爛歎亡梁  
明主容兵諫

溧州張紹曾藍天蔚軍隊獨立  
頑民總國殤資政院黨人持人道主義阻北軍南下  
有人

笑黃雀莫便捕螳螂

西海熱潮流橫衝南瞻洲  
共和學說  
但聞哀痛詔程德全電請下罪已詔  
莫

解聖明憂朝論臧三耳逃官貉  
一邱餅師矜異義九世託齊讎

渺渺黃龍艦金焦颺白旗  
海軍降南  
武昌不肯渡江北無援師  
程德全

督師攻張人駿  
作賊皆名士浙江湯壽潛江蘇張謇電勸各省獨立力阻北軍南下  
勤王

惡健兒曹州大刀會討孫寶琦  
廟堂棋不定督師屢易  
一著悔應遲毅夫奏北

方軍事責袁南方軍事責岑各分權限

反氣東南見天心問若何金元臣節少牛李黨人多禁籍出秦火  
明末禁書風行市肆康乾文字之獄禍發於今日比炸彈尤烈降軍盡楚歌遺民朱舜水

東海扇狂波 日本煽禍英使助之

只恨推袁誤誰爲覆楚謀漫憑狼拒虎已兆馬爲牛廣武一長歎  
堯臺曾見囚崇陵風雪裏哭望忽三周

引罪歸藩詔傷心誓廟期忍將禾黍淚併入豆萁辭 助澤洵濤爭權以迄於亡  
珠玉歸西錄江山付義兒 去衣爲載振義兒滇陽應啜泣急難鵲

鴿思 德宗崩袁欲立溥倫三至彰德密謀

北去知非計寧思狩熱河 以錫良充熱河都統死猶憐卞壺 謂晉撫陸鍾琦

父子詠欲託荆軻沉醉拚三月 暗用阮籍醉六十日事荒淫怨九歌墮驢

應一笑奉詔議共和 唐紹怡二十一日出京議和

南內舊鸚鵡猶知問上皇溫御史毅夫疏爭歸藩即日自劾棄官兩宮還渴葬

三海儘榛荒攝政府停工程章武思遺命嗣子不可輔則自取之昭烈魚水君臣不應

有此言房陵忍負王猶望爲霍光單于思漢德用王莽事不忍言矣莫遣犯邊

牆滿蒙回藏非我有

不見金田亂曾煩白馬盟殺人皆劇盜屈已爲蒼生未敢論王命  
應憐弄父兵中原膏血盡何必問虧成

白山黑水畔禹裔四千年誤讀明夷錄休論盜跖篇帝思盟息壤  
我亦飲狂泉莫被河魚笑出膏還自煎

附錄蟄庵題鄒崖雜感詩後三首

慟哭西臺記淒涼北狩篇自愁過十日沈恨類千年冠冕今眞  
毀膏蘭昔自煎向來蕭瑟意歸臥及春前十二月二十夜鄒崖阻余辭職及

廿六日鄒崖亦棄官逃矣



故國看遼鶴新詩似董狐將軍原不負  
戍卒竟能呼曹社謀先兆堯臺事未誣  
建章千戶閉臨曉一星孤

九錫威鈇鉞三旬斷鼓鼙傷心秦博士  
慚德漢征西篝火妖狐穴春風桃李蹊  
謂余今不信杜宇已成啼

### 天命一首

長白山頭松枯凋入關王氣未應消  
中原劫火纔三月喬木荒烟已十朝  
豈謂雲雷陳虎豹竟教風雨感鷗鴉

十二月初七日段祺瑞等聯電

要遜國倒戈北向

年來愛讀一公傳

用山谷詩意

天命何曾敢惠徼

南京協

商贊成共和以總統推去衣

### 有贈

曉過濯龍槐柳東兩潘二陸記相逢  
人如秋去春來燕天有朝南暮北風

王門熱客曹陸汪王輩潛通款南中

漫以鵷鴟爭腐鼠任教鳬乙認歸



鴻

余向主變法多疑爲革命黨

望塵縱向車前拜

袁唐入都鄒嘉來必首到車站趨

迎極恭解璽寧須舊侍中

明日

地覆天翻明日事汗流淚下五更時沈吟不斷喃喃語只是梅村

金縷詞

後聞陳簡持自吉林歸臥病上海半年亦日喃喃誦吳梅村金縷曲與余相同晚矣

前門車站書所見

手提革袋下車場白髮青裙黃四娘

望而知爲南中殉難官眷運櫬歸者

越女

欲從論劍術會當刺殺黑衣郎

祭竈日留別庵中花木六首書贈毅夫御史

憐爾太柔弱傷心只舊人東風已無主纓珞爲誰春

丁香

早教風雨折幸免斧斤尋草木無知者堪參天地心

紫薇八月爲狂風

折矣

此亦海棠樹煤山舊日花明年香雪裏春色屬誰家

海棠

惡竹休輕斫還貪夏午陰後枯憑一溉省識此君心

竹

纂纂攢星紫風簷鵲啁噍任教兒女打莫遣落東鄰

棗

獨抱冬心苦干雲氣不銷枯禪有如此風雪已三朝

柏成化年物也

### 文姬

誤嫁娉婷悔不禁塞笳久已變胡音千金漫想蛾眉贖歸漢曾非  
節婦心

以憚南田歲寒圖質五百金辦裝南歸

畫蒼松四尺襯蠟梅天竹子款

字近褚河南

除夕風雪不出門抱畫躑躅海王邨市人驚怪鬚鬢禿昨猶袍笏  
今黃冠

廠估日以書畫青花瓷踵門乞售廿七日驚傳余削鬚髮爲僧

忍飢肯索胡奴米

行裝莫壓鬱林船拂衣明朝歸南園倉皇八口愁盤纏典琴賣畫

亦韻事文武道盡今獨難纔卷重看不忍別中有藐姑仙子亭亭  
魂風饕雪虐天地閉渾然元氣迴毫端兩行淡墨題紙尾纍臣悱  
惻哀蘭孫

瀕別草草跋數語顛末

我得我失亦何恨內府圖繪焚金元玉

軸灰飛付兵燹過眼何一非雲烟千金敝帚奚足言

張鐵昆學士許價

千金

治行倉卒典半千春初買得北監廿一史尙負老譚番佛三

百尊對此茫茫摧心肝南田大畫不多見作家本領誰復論戲仿  
徐熙沒骨法東絹四尺粗紋圓

惲畫鉅製罕見

筆椎金剛透紙背神超

環象搜冥立蒼松輪囷虬龍蟠綠雲潑天釵股攢檀心磬口黃蒸

栗石竹結子珊瑚丹

蒼松四尺襯以蠟梅天竹子著色鮮活康無此顏色款字近褚河南

歲寒相伴不寂寞貌削神腴天獨全胡

天游惠

棟錢

維城陳

兆崙秦

瀛吳修齡

浚儀

二十家跋眞而完畢宏韋偃死已久神妙不數梅

瞿山不知何年入怡邸

覺羅嵩某舊藏轉入怡王府庚子購自印度兵手

畫苑款識

遺摩編長安大掠珠玉盡馬肆檢拾煤炆昏象臺銅儀永樂典牛  
腰駝背輸諸番

觀象臺渾天儀翰林院永樂大典庚子散佚輦送番舶

烏牙畫版若

神護不投灰劫留人閒十年南北隨篋衍昕夕摩挲忘眠餐天壤  
尤物能有幾褊衷寧敢私兒孫班史質錢雖自愧宋琴抱死非達  
觀天球河圖且散落況乃一幅坐守窮京官楚弓但使楚人得  
物聚必散吾何怨絹壽不過七百歲殘縑蠹食無常存不如借作  
買山計此行不爲思鱸莼且買鵝溪一疋絹畫我小港梅林灣

港離羊城十里梅花最盛

萬松攢翠浮邱壇不然畫取鄒崖竹千竿白沙

臺下洶湍瀾使人疑是嚴陵灘陵谷雖變稿本在後人亦作南田  
看

### 黃檗道人詩齊東語也戲題其後

崇文宣武讖誰知

或言北京正陽門左崇文右宣武爲崇禎宣統之讖

玉歷虛傳黃

櫟詩一代始終王攝政兩朝荒亂后慈禧

永明太后徽號慈禧

戍防大

計誤經略

己亥會試下第歸舟中讀坊刻洪經略承疇奏對曰或旗兵駐防各省他日必爲清室

累此洪弄狡獪也辛亥變起果以駐防人數百萬牽制投鼠忌器遂定和議反間冤魂託督師清兵入關以反間殺崇煥以袁得以袁失蒼雪愁山今我是何堪再見黍離悲

### 讀金史有感

幽囚照碧堂踰跟雙溪寺自焚幽蘭軒君死社稷義

### 憤言

賣菜乃求益市瓜唯取大少靳西園價竟聞天子賣咄咄三百萬  
築臺將避債送璽悔皋亭銀絹轉外解

### 除夕

沉沉霜燭影明日是何年掩淚翻新曆歸裝只破氎衣冠今夜盡  
鐘漏五更前

用邵子語

寂寞乾清殿宮鴉啄御筵

元旦余赴乾清門朝賀大臣

壬子人日玻璃廠晚步

十日春陰感不勝夕陽殘雪照觚棱  
虎坊橋畔布攤子猶鬻黃龍  
舊誥綾

別小巴狗有感

誰家能豢汝便是主人翁戀戀終當去  
纍纍我亦窮依然搖尾態  
況有吠堯功燕市無屠者鬚牙儘自雄

天津逢乾清宮王內監萬順

餽歲兩罌宮醬肉早朝風雪獻茶人

端午冬至臘月三節王內監例送內廷值差

官宮醬豬肉凡上書房帶使臣覲見必獻茶

白沙亭上今相遇猶識先朝執戟臣

出東門

沙河流水黃花岡春草茸茸校射場  
正是木棉三月暮家家香火



祀張王

半塘見翠鳥

翠鳥戲煙灘臨流惜羽翰自甘儕燕雀未敢逐鵙鸞天地皆羅網  
江湖有釣竿羅浮堪逐暖尙畏北枝寒

竹岡展先武翼都尉府君墓

國破家何有人窮呼所生餘年當誓墓奉母得歸耕悔不學弓馬  
覲然慚聖明先臣忠烈性陵谷若爲情

注

庚子圍城中奉書不許出都門一步謹泣

雜憶

陵谷西山未變遷佛家猶有報恩篇承天門外秋槐落朝士寧無  
李伯淵 憶翠微山海覺禪師

己酉六月宿龍王堂師謂余有根器爲演生死大義  
勸棄官爲僧慧眼殆見今日望其爲恩長老也



冰泮金鰲柳未青傷心豈獨雪香亭老臣昨進宜春帖麀鹿黃羊  
賜內廷 懷陳弢庵師傳 年例賜大臣麀鹿黃羊此爲婪尾矣

再世中興自古稀覆巢完卵亦難期紅羅三尺摩訶院怕讀宮娥  
絕命詞

虎步狼睥已早知辨姦一疏世猶疑忍將家國無窮淚贏得曲江  
望祭思 懷梁節庵京卿 戊申刻去衣疏有虎步狼顧語宣統元年三月梁格莊奉安

余約羅癭庵赴察院上請改正戊戌庚子實錄摺項莊之劍猶梁志也察院不敢遮伍叔葆以疏稿轉達  
張南皮張激歎亦不肯發大難潘若海鈔呈肅王善耆允代達攝政王卒不省以有今日

五官風采照時髦車騎春容訪北皋 宣統二年袁大公子頻枉顧招宴約結社極  
殷勤 我自草玄甘寂寞劇秦事業讓蕭曹

君向遼陽我向秦相逢馬上語酸辛夢中蒼莽潼關路落月黃沙  
望北辰 紀正月二十夜夢與毅夫話別

掛冠未忍去東華實錄知存萬戶家白髮刁騷舊史氏遺山流落  
尙天涯毅夫以實錄未竣滯留都下昨來書已掛籍白雲觀作道士矣

賣車東市不論錢黑騾車馬牽出東珠市口三日僅鬻二十金辦歸裝出厩青騾也  
泫然不是故人分鶴俸江湖無計買歸船剛父借三百金始成行可感也

### 讀史

青史無從覆舊棋歸周白馬盡微箕奕劄溥倫首贊共和十年養士有  
今日革命軍多學生九廟勤民又一時陶阮亦曾汚僞命清吏並斥爲僞職

義炎以後此朝儀總統受職人民城郭都無恙五色風揚大國旗

光緒二十八年余丁外艱鄉農黃毛忠賣絲至容奇見學生體操奔告余曰亡清朝者必此輩矣官自製  
亂不可救也余甚詫之自愧讀書做官二十年見識出黃毛忠下張香濤張野秋輩想亦憤然也

### 金牛坑曉望

十畝閑閑了此生金牛坑下課傭耕不知世變看潮汐漸悟人情

似雨晴太息三綱今已盡後漢逢萌語沈吟一死惜無名寺前深似

昆湖畔小艇穿荷露氣清寺前深曉立髣髴西苑橋頭抱牘立風露中見湖艇從荷花中

出

### 釣磯

且向鄒崖石城吏目鄒忠介訪陳白沙泊舟吾鄉馬鼻石巖下後人刻泊鄒崖三大字賃釣

磯從知四十七年非賺將風月供吟藁還我江湖一布衣故吏忍

教名項籍清吏有斥御名者黨人那復冒林希黨人冒康梁者多拾康梁餘唾鷗

鷗灘畔潮初落野鶴梳翎自忍飢疏客月俸二三百金負債纍纍鷗不得飽遑論

野鶴

### 明朝

明朝饑飽誰能念一姓興亡未足悲名字已登桑海錄衣冠可是

漢官儀生逢堯舜今何世論到荆高費我思昨夢光音天上到無

貴賤男女界別眞共和之極軌也 金輪珠網總迷離

聞王湘綺入都就史局

出嶽閒雲任卷舒，浮湘心事待何如？江南不少徐常侍，它日終當有信書。

晨興一首寫寄瘦公

晨興羈緒亂如麻，雨後攜鋤學種瓜。壞壁巧緣輸蝨蝨，

部長都督屢起

屢躓

荒池狂吠厭蝦蟇。

議會報館狂吠

於人無補羞充隱，

六月令有或高蹈

爲懷語此事終知似煮沙。

五族共和蒙藏先離辛亥十二月初七日曾論陳于政府不幸言中

只恨故巢蒿艾穢，歸來秋燕已無家。

賃廬穗垣無鄉可歸

香港走送圓默道人北行歸途舟中口占卻寄

十二月廿三日

一天靄霧去何之，不解棲皇歲暮時。取月彌猴緣井苦，逆風鷁鳥退飛遲。餘生分作溝中斷，引著重參劫外棋。避世伯鸞私自念，死

應塚愧傍要離

圓默留別詩有要離語世有其人以父事之

### 過光孝寺

久蟄思暫動強游殊寡懽乘春散堙鬱出郭趁晴暄躑躅未三里  
感喟增萬端所見非故物大厦多閉門

富室避亂港澳

喋血橫北里陳

塘南日事讎殺

游讌盛東園山堂成馬肆鑾道呼民團稚女半高髻反

正髻似巫來山裝

駟僧皆籐軒佯恭媿故僕側立避新官信步淨慧院

杪羅故檀園昔居檀越堂

在光孝寺東廊二十年前與程御史友琦李編修翹芬崔孝廉

誥成昆弟讀書處今成瓦礫場矣

寒檠委頽垣俯窺達磨井殘甃埋斷幹儒佛

同一劫禮樂今幾存

程子言三代禮樂猶可見於僧家典範今同日掃地盡矣

投老思

初地讀易歛悴魂所慮汰僧道因以驚邱樊高蹈招俗詬北遊聊  
漫言古淚灑鐵塔營魂颺風旛不厭逃空虛頗幸生憂患達節知  
有愧獨往得所安回途訪故人去年易黃冠離家已兩月啍經朝

三元 訪楊敦甫不值其家人云往三元宮誦經歸無定期也悼往苦情滯思來覺理難  
嗒然失所歸臨風忽洩瀾

寄懷海覺和尚

萬事而今都算錯佛前自懺過去惡廿年何物最疚心辜負西山  
紅葉約 和尚約看紅葉宿諾未償

癸丑正月十七日作

不解白翎雀中有孤嫠聲夢折鸚鵡翼魂逐海東青鸞輶黃龍繡  
番僧般若經鐘聲十萬杵那復耐東陵

節庵京卿再謁崇陵却寄

更無餘地報君親長是江湖負罪身松檜萬山風雪裡一年一度  
上陵人

醉後漫興

春來雜興寄田園不廢茅檐負日暄  
昭諫詠松原有託泉明述酒  
欲無言何妨鄭五作丞相未信朱三有子孫  
偶憶山僧潭柘話雪中銀杏至今存

潭柘銀杏土人稱爲帝王樹陶潛述酒哀恭帝被醢作

### 憶棗樹院書寄胡勿庵

在米市胡同關廟西院

棗花一院劫塵封琴塢壺園

米市胡同古蹟夢裡逢雙柏佛堂風雪夜

老尼不誤子時鐘

比丘尼年七十夜半啞經風雪夜不輟數十年如一日時勿庵居保安寺街

軍機下直常過我携燈棗樹下論書聞鐘始去思之如隔世事

### 江村即事

春半秧塘放水遲東風吹綠上桑枝  
退潮斷堰分蠓女過雨橫沙  
撈蜨兒水馬偶觀知進退陂蛙狎聽忘官私  
廿年車馬京塵厭一棹江雲信所之

### 夢中作



海水西流月左旋深衣一誤四千年氣來駕鼠俄而化理閔夔虵  
各見憐屈己共推菩薩行王荊公以馮道屈己安人爲有菩薩行至人還有讓  
王篇九儒八妓休輕笑擁髻伶立亦泫然

寄懷徐州張定武兼調毅夫

相見韓家潭將軍聲伎耽

初見定武在韓家潭芥子園時張文襄在軍機也琵琶催

馬上

采芝上琵琶定武舊交也

貂帽下江南

戴碧犀金邊帽似貴公子

應悔畫眉

事偏來白簡參而今蓮幕下風月與重談

毅夫新補御史銳於言事疏參定武

流連風月因匆匆赴江南今我輩如劉幼雲胡琴初商藻亭與毅夫並入徐州幕談舊事當啞然笑也

象峯春暮

海畔看雲負手吟木棉花落晝悵悵露畦枸杞甘於肉春水魚苗  
小似針失主牯牛眠雨瘦避人山鳥入烟深烟髻峯山麻鳥聲最清越清明  
上塚聞空際高唱使人意遠可憐一樣厓門水今古孤臣兩樣心象峯下海水直

出崖門

答人問北行期

一春烟雨昔霏微  
蝶醉蜂狂總亂飛  
看到薔薇花落盡  
曲江游女也應歸

仕宦至亡國不可以歸矣

讀晚唐人詩集得三人各紀一絕

風義稜稜請伐梁  
胥濤怒捲震錢塘  
江東目已無餘子  
羞獻唐風

三十章

羅隱

壬子二月與粵當道故人書陳去衣五罪請北征

香奩一集麗情哀  
靖節閑情漫浪猜  
蠟淚領巾猶滿篋  
誰知曾將

虎鬚來

韓偓

可憐餓死王官谷  
唐末詩人第一人  
今後已無高士傳  
休休亭上

且凝塵

司空圖

梁節庵極愛此三絕題云君爲羅隱吾韓偓說到王官愧汗顏跋云一隱一偓

極切今矣圖且無之奈何

游光孝寺

燈火記訶林十年緣法深便成投老計未負讀書心甕菜半池水  
老榕一院陰重游眞隔世物外有招尋

效元次山贈黨茂宗篇戲贈

詩人冒鶴亭自命爲遺老抗志希顧黃終日逢人道遜國甫下詔  
挂冠寧不早躑躅京塵間郎潛苦枯槁忽攝甌海關捧檄笑絕倒  
番舶載珠玉前騶擁羽葆富貴苦逼人欲避計良左達節良有辭  
忘世亦太果少年失所天自憐紅顏好孤嫠中夜哭一朝遂草草  
黃農如可復堂陞跡如掃焚芟當從君補鍋將悔我微霜消見睨  
良玉堅試火敢辭北山嘲庶免少微禍屈己能安人菩薩志亦頗  
置身夷惠間通介無不可寂寞水繪園風流今未墮雖愧蘇厚庵

郵傳部主事蘇輿湖南人王祭酒先謙婿遜國日棄官移書讓尙書十部京官即日去職厚庵與鄙人而

已尙勝汪榮寶 民政部左丞汪榮寶十二月十六日以遜位詔遲遲不下忿辭職知清室將覆

討好革黨也

### 遣興

神龍有慾從人擾山木無才得自全  
春盡燕歸知漢臘雪寒鶴語憶堯年  
巾車偶過陶元亮閣狀寧投郭恕先  
自署白衣前進士殘鷗賸鷺送華顛

自慚天壤一游民陶器單衾見道真  
谿柳易生緣近水野花亂放不成春  
西山有罪成殷腴東海何顏冒晉臣  
宋周虓爲晉復仇他日是非誰料得  
長安點點馬頭塵

### 客退偶成

廿四朝無國不亡隨人悲喜各登場  
緋袍尙愧孫供奉青史應憐王鐵槍  
獵隊隨宜拈佛果江鷗閒與話滄桑  
年來我似吠堯犬咄

咄書空未是狂

余素不識曲昨偶聽西房掌一齣忽不知涕之何從音樂移人乃至是耶癭公聞之必以爲通而蔽也

亂後聞歌淚不禁背人挂頰自沉吟誰知陌上秋胡曲便是西臺朱鳥心

感西藏事

昔持旌節地今日棄維州長恨西征誤空憐北使留

駐藏大臣被拘留

殘碑迷赤嶺舊事記紅兜邊將思城燧鑪關賦二矛

蜀軍經年仍駐巴塘

白馬朝松漠金符羈外臣但憑龍象力況有虎狼鄰劍閣雲飛粟蓬婆雪沒輪番僧持殺戒怖鴿自能馴

兵事關宗教相持動百年重尋西域傳併入北盟編青海通蕃馬

玉關聞杜鵑毘嵐風不定直過柳條邊

藏事不定蒙禍無已時

上塚

春水挾藍試浴蠶出牆稚柳碧毵毵民間尙識嘉平臘上塚明朝  
三月三

過蒲澗懷古

安期上書說重瞳奇計不用天無功託詞采藥入南海兀傲不臣  
隆準公五嶺以外仍秦封黃屋左纛鬱葱葱深山大澤盤蛇龍不  
辭皂帽依遼東刎頸將欲田橫從世人莫擬商山翁神仙大半皆  
英雄鄙哉議禮叔孫通愚民之術嬴政同

見某公憲法條深惡之

太牢祀

魯神其恫東封不到二禺峯濂泉澗水菖蒲茸白雲一去長冥濛

小金山寺

入門僧舊識衣上十年塵聽水前朝寺看花隔世人海雲戀岫懶

野蝶逐春新一棹鴨墩去迷茫烟雨津

有感

十縣有分汎三江各駐兵來自貔虎隊不入五羊城

龍濟光倚觀音山

爲巢穴桂軍東下調陸軍警衛軍入駐廣州市佔官署民居雞犬不寧致各縣空虛盜賊橫行

北沙鯉魚塘課桑二首

開沙趁曙涼月墮魚塘底綠桑高於人葉露濕衣履行過竹橋頭  
臨谿且櫛盥坐愛釣石浮不覺早潮滿去去拾草稗草長桑葉薄  
蹲久腰脊酸螯手毛蟲惡四體不能勞一歲將焉託

土語謂往南北沙

耕爲開沙

午雨桑葉貴午晴桑葉賤繭大魚復肥不羨作州縣一年占八熟  
賣絲完秋稅大道在雞埘生計託瓜菜少不學稼圃遂爲聖人欺  
君子憂其大小人養其私餓死亦常事游惰咎何辭



餘生一首

頗幸餘生免采薇未應好亂敢天遣看星夜半私流涕聽葉霜前  
已見微倦羽關山何日息破舟風雨不知歸挑燈重讀頭風檄尙  
覺人間有是非

四月大借款成事急胡君密遣古祕書問計於余函中有悔不早用公策語勸  
推岑三爲盟主翌日古來辨論再三乃定策余實累岑出亡矣

鄒崖遺稿卷三

順德何藻翔翹高著

中秋不見月三年矣

三年此夕逢風雨草草江亭遂至今

辛亥中秋與賴煥文黎露苑讌陶然亭冒雨

歸越四日武昌獨立壬子癸丑中秋皆值雨欲乞天公借明月秋光不惜買千金

是夜月暈如血龍濟光槍斃陳六葵於觀音山蓋奉袁第三次密電云附記

發願戒詩兩月矣醉後忽得三律書寄癭庵

劫雨藍風夢裏身從今當作太平民

洪秀全號太平天國

頗羞謝掾還

尊孔

余料京津孔教會長他日必勸進

只惜劉棻託美新

謂康門弟子

半畝菜

園心且住一盂豆粥食兼旬鄴都浩浩菩提道省識德彝亦士人

某祕書舊交也

廿載天橋一酒徒青龍袖底氣豪粗流年豈謂逢猓尾舊事還驚

捋虎鬚黯黯秋魂猶昨日茫茫天意在江湖蘆灘篝火時明滅亡  
國誰曾悟雁奴

只媿疏慵負聖時

癸公來書述熊內閣推轂意

空山小草避堯曦負舟大壑

人誰覺占斗漸臺夜未移託興漫嘲三品石招魂待續四哀詩

故

人樸仁將軍福州死事最烈欲弔以詩未成 虛堂熟視愁風雨野葛秋階蔓暗滋

### 秋懷一首

驕陽雖已去秋懷轉更悲落葉不可掃倏復盈堦墀決明爛秋雨  
野莧吹寒颼除架日蕭索涼蛩淒以飢嚼人蚊蚋毒鑽紙凍蠅癡  
豈無蘭菊秀旋隨蕭艾萎一朝履霜露轉願恆炎曦短日迫窮陰  
中夜寒無衣叩門哀鄰媪乞借酒一甌聊用潤燥吻寧足救羸飢  
一甌且復盡未暇卹吾私匪病胡嘖呻遑天還自疑貞脆本物性  
枯菀隨天機譽松而詈柳徒爲達者嗤萬慮苦煎熬抽刀斬亂絲

地本無東西天亦無四時黃赤無定色美惡無定辭古亦此風月  
今亦此黔黎年年春復秋坐歎將何爲女媧搏土後五濁無清夷  
慨想黃虞盛瀆亂猶今茲秋士可勿悲我且食蛤蜊

江東一首贈張定武

紫雲笑贈老將軍

馮河間駙馬旌旗南北分

段合肥

妒殺江東楊大

眼掌書待乞薛靈芸

袁氏以義女餽馮段爲妾定武寧能無妒耶一笑

題篁溪歸釣圖

珊瑚洲詩客愛魚蝦擬向篁溪泛釣槎只怕石龍風浪惡歸舟有犬  
吠蘆花

時海盜勒抽魚船錢故云

翩然滄海一漁叢漫學君家老志和夜夢昆明湖水赤金鰲橋頂  
釣豬婆

羚羊峽下鷗鷺飛甘竹灘頭春水肥都是老夫湯沐地不須敕放

鑑湖歸

康處士幼博歸葬西樵哭送

東澈遺衣血尚新重來丁鶴語酸辛  
令名壽考寧兼得一掌江河  
未易堙燕市有魂歸故國橋陵何地哭遺民

梁節庵先生約赴梁格莊十六

日觀禮因事不克行宋何菊屋有哭望橋陵詩

撫棺不盡滄桑感長慟西川楊舍

人  
楊叔嶠同年

甲寅人日宿九龍山人家題壁

綠裏園亭自一家年來種菜是生涯  
五更枕上關心事雀啄新畦

豌豆花

登廬主人自述心事撰句贈之

阿彬律道山樓夜話述呈長素工部

殉城虛愧二千石

甲午相余謂他日當以太守殉城今覩然亡國大夫求死不得至可痛也

居攝寧堪十四年

余謂新室歷十四年兩人墓木拱矣先生曰外人不我待也

山海沈

冥龍虎伏嘗以虎氣必騰上龍性誰能馴楹帖見贈網羅挾破鳳鸞翩感懷風義  
悲靈運名德期頤笑褚淵並是夕語贈我松筠詩扇在乙未承贈長句云  
君不見諫草之堂何巍巍三百年來過者頭皆低紫藤書屋何鬱鬱中有二直人不識紅羊劫換  
各華顛

花埭

花傭亂後好生涯旁拓茅亭午賣茶流水聲中春暗換滿園還是  
舊時花

柬九龍眞逸

鯉魚峽口海潮迴疊嶂盤龍翠幾堆唯有此中堪避世不須憑弔  
宋王臺西人展拓租界華民輒爭界址由今思之轉幸得避亂地也

廣甄齋追懷廖澤羣夫子

三禮瀾翻獨貫淹深衣樸遯道淵潛西京經說毋傷瑣師語翔曰西漢



經說唯存韓詩外傳董子繁露多微言大義與今考據家異 東塾論文不厭嚴 師論文每述東

塾倫脊二字諸孝廉多苦其太嚴 韻學專門今遂絕 師傳東塾韻學今成廣陵散矣 儒

林一席惜難兼 國史館立傳徵遺箸以經說未刻遂入文苑傳 六年講業高期許

一事無成雪鬢添

### 泰華樓追懷李仲約夫子

不分詞臣老石渠參謀幕府辱虛譽 乙未四月師留晚飯縱論時局歎曰朝廷如

用我必以老弟作參謀軍機諸公但知若農能讀古書作北魏字真憤憤可憤 撤簾尚憶先朝

事 師性通脫而入直南書房二十年未嘗曠班嘗疏諫頤和園工程詳告翔清初征尼堪布屠戮納蘭

部落逃免者今爲那拉氏殆天數云 憂國偏知王氣虛 師通術數多奇驗嘗語翔曰老弟好

講經世學而不曉氣數汝在兵部嘗帶領引見晨入東華門試望氣當知國祚不永矣且勿說西法吾與

汝行將左袵也 銀鹿異聞鈔秘史 嘗借鈔師註元祕史雙溪醉隱集四庫提要 荊駝劫

火訪亡書 師藏禁燬秘書百餘種 而今白髮彭宣在泰華樓西檢蠹魚 癸

丑七月李孔曼約檢理藏書評定價值

哭楊惇甫學部

不解作符命華林信道巾

原作士有不從逆沈冥寂寞濱

六經寧墮地一死

乃完人遺集韓承旨

鼎革後撰刻仍書故官高風井大春

經學最深他日當以經

生入逸民傳唯井大春差近之

會應鄉社祭

祖居與余同里閭

磊砢見松筠

瘦庵書來誇京寓花石之美以此戲之

秀野曾傳名士廬

舊居四印齋即秀野草堂故址陳簡持稱爲名士廬

安排花石頗

蕭疏藏經偷得嵌四壁

瘦庵得燉煌石室唐人寫經數十卷貽余一幅余戲謂百年後逃

不得一偷字

銅佛乞歸禮六如

每游西山卑辭向寺僧乞銅佛歸供案頭纍纍百數十軀

蘆草竟無紅繡帶

居廣州會館與蘆草園比鄰惜今無顧況亦士大夫之羞也

櫻桃時

駐碧油車

賈郎壁雲居近櫻桃斜街

數椽茅屋秋風破可念鄒崖一老漁

蒲輪

笑逐蒲輪入帝京  
兔葵燕麥不勝情  
昔年韓范分疆治

李經義趙爾巽

等今日巢由下拜榮  
薄有才名袁彥伯

樊增祥易順鼎等

不拘小節魏

元成

平政院肅政使周樹模等

少微星比紫微小充隱還堪飾太平

梁節庵

于晦若沈子培勞玉初皆余舊交也

### 谿行

明月忽在水谿行人影長松陰沙路淨  
桑葉露光涼宿鴨驚鳴鴈  
流螢過短墻偶聞漁父語昨夜汐流黃

### 夜坐聞鄰翁談史

胸無一物話羲皇樹下春秋

粵諺以鄉農月旦爲樹下春秋

理頗長角里出

山終禍漢沙陀入寇是尊唐刺秦有罪應書盜論晉何功早辨亡

愧我未曾諳史法竈觚竊聽轉茫茫

三句湘綺飲冰四句芝甫五句袁煥也附記

芝甫同年允隻身走科布多謀匡復癸丑七月崑圃侍御玉春中書朱江外郎國雄走蒙古有所規畫往

來沙漠二萬餘里甫回津爲陸建章逮捕死獄中恭邸由青島電津詢溫御史毅夫消息泄漏溫匿洋行  
複壁得馮國璋救出初芝甫繞外蒙古走俄至日本爲邏騎所獲因見小村大隈獲免

### 江樓晚坐讀南史

空替古人愁海鷗也白頭江山猶魏晉風月自春秋暮雨遲歸鳥  
白雲招去舟信知天宇小物外任遨遊

### 次兒鴻達喪自美洲歸葬

即補知縣充出使美墨秘古國繙譯官波士頓工藝

大學官費生

送我恆河舟豈意成永訣亂後家業盡愛子天復奪自悔骨肉薄  
忍使七年別噩耗電飛來玉樹風摧折茫茫太平洋旅魂難超越  
峩峩落機山積恨齊巖嶠汝生少簡默貌樸中慧黠隨我使衛藏  
問年才十七躍馬閭王澗英鷲罕儔匹留學保羅院算術當第一  
肄業印度兩年習兵操幾何常冠英印學生 二十赴古巴使署充記室偶作公園

記文筆頗挺拔矢志入大學上書辭簪笏負笈波士頓勃宰理化

窟重力驗鈞髮微積析塵忽盈尺程課書攻苦匝月畢去夏暑假來書語

勗學恃神强苦思成腹疾汝兄鴻暉農工商部小京官德文畢業生瓊州去離

家四十日忽傳蹈海死遺念寄衣襪或疑變姓名海外學劍術存  
沒不可知音問兩年絕以汝客異邦忍痛未敢說汝母日夜哭血  
枯存瘦骨今復迎汝喪於理難久活汝妹輟學歸目腫腸寸裂阿  
婆老淚乾痛孫幻想結從俗結鬼婚慰情庶同穴花圈懸墓門喇  
吧吹鳴咽合厝觀音堂桑下豎短碣以余更喪亂百感隨觸發求  
死苦不得虛名招天嫉勝國所養士不作新朝傑死從先帝后義  
不食薇蕨天地一蒼生於我復何物沈憂能傷人委命强作達武  
漢邁玄黃南北相屠殺莘莘青年子驅之餒殍西歐九國師空  
中礮雲熱爆地起蟄雷樓櫓隨煙沒火器學日精禍種博士烈彼

孰非人子百萬戰場血假汝爲國殤泰山渺毫髮晏然牖下終猶  
勝裹革卒軀殼歸太空靈魂終不滅冥心參萬化如是觀一切苦  
惱緣愛生觸覺皆幻設觀河性不變脩短等電瞥無生自無死未  
縛何解脫

覆園題壁

屋傍荒地編籬種菜顏曰覆園寄意也

寬著庭除貯月華旁留蔬圃半棚瓜棕櫚三面不見路山杏四時  
常有花新汲井華添雀食自拏籬竹織魚叉約親信已吾何忍朝  
市豬肝暮市蝦

雨夜書寄毅夫琴初若海君用孺博

雨夜讀陰符鄒崖一餓夫天心在草莽吾道尊屠沽壯氣豪吞虎  
餘生學養豬觸山填海恨九死未應渝

讀史



衡山弑義帝主謀實沛公新城請發喪嫁禍於重瞳背楚陰通漢  
黥布甘首戎助成豐沛業遂徙淮南封匪唯不討賊鐵券酬其功  
大盜竊仁義亂世資梟雄張芒奇女子乃恥嫁奴傭安期古烈士  
采藥肯相從

勿庵以余有喪明之戚寄詩慰唁次韻答之

勸除煩惱愛根纏恍讀南華第一篇老眼已乾滄海淚自鈔般若  
送餘年

### 贈素秋校書

絃索悲涼字較高低鬢揜袖撥檀槽胸中一部興亡史開口先教  
唱罵曹

校書已脫樂籍居昌華北街焚香修道嘗於柳波浦蘇樓音樂會折柬迎之特爲余唱罵曹

一齣聲韻悲壯盪氣迴腸洵絕技也

蓬萊橋聽盲翁鍾德唱揚州彈詞自述同光間鹽筴盛時游



讌事今故家零落此曲幾無人識者亦白髮李龜年也

鬼氣陰沉珠玉喉擻箏重與唱揚州南關潘孔牢盆盡絃索蕭條  
烟澣樓

梁任公約同王協吉韓樹園遊西樵白雲洞遂登觀音岩乙

卯五月

廿年不到白雲洞山靈見我應騰諷是何俗物呵道來看山銀刀  
小隊相迎送

時畏盜賊龍濟光令潘斯凱以廣海兵輪護送往九江謁朱子襄先生祠

昨宵

解纜九江口曉飯李村換輿從入山到洞日卓午黃冠已辦伊蒲  
供避喧載荔後山亭幽尋獨與故人共

謂任公

說法頗苦一年忙

靜坐難得半日空不聞人聲唯水聲去山三里谷響闐黑雲一角  
過岡陰

粵俗以白晝黑雲爲岡陰

榕腹避雨綠無縫七十二村烟冥濛大

科峯尖屹不動逍遙臺轉觀音岩岩口  
豁豁窄於甕天然石眼螺

旋梯仰瞰崩雲壓頭重左歪右躲手攀藤造物狡獪將人弄割然  
中開太虛宮日光斜漏得上狚賣符道士幾生修掃地焚香聽鳥  
哢欲借藤牀一覺眠晚鐘驚斷出山夢

哭麥孝廉孺博 乙卯

九日仰射弓弦絕陰蛻橫天劍鋌缺雨酸風澀角聲死月暈黃雲  
紅暝血白鼃化龍黑霧結跛驢簸車棘軸折蟄雷不起地肺閉流  
星有聲天竅裂嗚呼孺博人中鐵幽蘭娟秀桂馨烈秋鷹試擊初  
下韉六翮遽殞江南雪北望淮徐氣騷屑上月招余遊徐萬劫耿耿性  
不滅丈夫未死觀晚節龍耶豬耶那忍說康長素云梁麥今一龍一豬余未敢

斷語也

乙卯七夕

婦織夫耕劇可憐兒孫此債苦難填神仙亦有人間恨只悔當初

貫聘錢

丹穴

江山那管是誰家五等分封鐵券加

世爵案經參政院議准

王謝子孫多

附逆

勳裔勸進用王深寧語

韓彭心迹況無他

馮張表明心迹通電

諸公何苦

熏丹穴累我明朝買海槎

袁對馮言將逃讓倫敦

袖底有箋那敢出休文

自恨鬢霜華

此獠遜國前一天言自出山抱定君主立憲宗旨今又抱定共和未著黃袍前一刻

鐘口猶未死也

逸社小集贈楊茂才伯典

此夕得爲文字飲匝天風雪釀繁陰

勸進文字交馳

人經亂後方思舊

事到窮時或悔今那有工夫還拭涕却從何處與安心商量舊學

多宏達不信山堂遂響沈

時壽安會勸進函電交馳有持鄙下書敦促余出山者

哭于侍郎晦若

風義託江海精魂盪九垓可憐虛一擊公與陳弼庵均勸雲階就民黨推戴豈

直哭斯文青島隨紅劫蒼梧望白雲拊牀應不瞑莫誅宋徵君

香火椒山祠同官憶左司藤花涼煮餅兵部武選司祭楊椒山祠以紫藤花煎餅

椿樹夜談棋庚子圍城中時過椿樹胡同寓齋夜話都是前朝事那堪死後思

山堂今馬肆淒絕鶴歸時公學海堂肄業生

哭潘若海兼寄胡琴初丙辰四月

康門潘麥孺博去年死兩畸士逐日虞淵絕臙死姓名尚未掛朝籍

江湖窮老書生耳衆人國士何足齒每談國賊怒裂眦北走瀋遼

南鬱水甲寅八月自金陵赴南寧游說陸督三寸之舌七寸匕蒯生辯才今有

幾夜深過我屏入語袖出軍書血滿紙大罵梁湯況餘子鞭箠隨

人眞羊豕飲我蚺蛇膽一杯乙卯九月再赴南寧歸以武鳴所貽白花蛇轉贈居昌華

別墅五日昌華樓頭星氣紫三更東南角彗星芒熊熊兩人撫闌長嘆盜印金陵

事弔詭

十月北兵逼江寧日緊梁任公南逃過滬君乞設法救馮任再三辭偶漏蔡松坡謀定君詭

告以滇軍朝起江寧三日必響應任以約定入瀘紆始宣布電報不通師期難改君與梁公密謀盜江寧  
印發急電至滇電到蔡大喜宣佈獨立江寧寂然梁懊悔曰川南死尸數萬皆潘賜也在肇慶聞君死日  
此吾摯友死復何言 電掣龍潭迅雷起誑傳三日會師期君何孟浪一

至此得毋踞人爐火上如箭脫弦不能止病中語我頗自喜十日  
不見遽死矣拊牀猶頷溫御史槩庵自滬歸見不能語唯點頭而已琴公聞之  
似何以爲生念孤子

武鳴將軍歌

竝柬譚陳兩師長

桂林義師天下聞武鳴將軍鳴驚人奇兵夜斷大藤峽東軍卷甲  
投戈奔橐鞬相見兒女姻丈夫爲國無私親牂牁江水春沄沄  
羊峽下艤艫屯南馳湘衡東八閩蛇山立馬燕北吞刮席汗額驚  
亡魂削除帝號黃袍焚吁嗟乎登極表勸進文談忠說孝徒紛紛

先朝勲舊亦有人如鼠竄穴蝨處禪奮袂討賊唯將軍自言鎮南  
關外椎埋羣厭聞法家者言如絲棼不解轂文嚼字唯打仗諒山  
識拔岑公恩天子待我頗不薄開府嶺右蔭後昆中更世變隨屈  
伸五更枕上淚漬痕老賊視我作馮道有死寧肯奴朱溫座中慷  
慨譚與陳拔劍瀝血酒三巡暗鳴甲帳生風雲寧爲南中鬼不作  
北朝臣事敗散去龍州復作賊醜顏再醺羞釵裙

此潘若海乙卯九月自

金陵持馮河間函赴南寧歸爲余述譚浩明陳秉望言如此

閩中部勒不動塵盾墨

草檄嘗宵分北來中使日窺伺肱篋告密相批根

陸爲余言潘若海齎到

金陵書藏枕篋哀賄其祕書盜去告密

蜚語頻聞刺來歛相圖况復喉高勳

龍

軍征滇實兼圖桂

伏如處女出脫免旌旗天外疑鬼神震雷一聲魑魅

伏盪滌雰霧開乾坤五月六日歲丙辰北斗睽睽漸臺昏禽操馘  
懿雖未遂稔惡自斃天心仁罪坐一人非黷武班師踰嶺還綸巾



舐筆自撰鏡歌新椎牛饗士梨園春公有梧州奏凱詩九龍寶刀夸座  
賓洗兵白鵝潭水渾皮鞮踏破黃花墳六年三亂勞吾民當令五  
嶺安耕耘三月廿三日岑電招余與毅夫赴肇宿端溪書院一夕詢南北大計馮張態度陸十七  
日已回梧未獲見

九月十七日宋皇臺祝趙秋曉先生生日和九龍眞逸編者按

東莞陳太史伯陶居九龍自號九龍眞逸

嶺南今土族半出宋遺民自南雄珠璣巷來重話白鷗事都爲龍漢塵

雲車風馬想甲子大溪濱一盞薦寒菊秋風吹角巾

設位兼林霽山謝皋羽招魂復趙晉方興儘敎亡國鬼空集化人場

生死還今日興亡盡此觴茫茫十七史何必問滄桑

攬揆登高後江山秋氣多併爲三日哭九月十九日爲廣東辛亥獨立紀念日

且續八哀歌東莞八遺民錄劉鴻漸撰天命已如此古人無奈何茱萸秋

曉先生句詩人只合住茅屋天下何嘗無菜羹行處有初念肯蹉跎 辛亥十二月二十六日

棄官甲寅熊內閣招聘丁巳馮國璋電聘出山不敢負初志也

九龍非我有漫說宋皇臺只合中原死寧徒易姓哀忠臣出盜賊  
遺老空塵埃淚盡崖門水花溪魂儻來南歸十年不願逃港澳託庇外人故第三句云然

### 無題寄明夷乙庵檠菴琴初

六張五角恨相牽璫札虛煩青鳥傳 乙卯冬三十三人上金陵書原出鄙議劉幼

雲屬稿推瞿善化領銜 神女迷離曾有約 王御史寶田兩到金陵已定議推馮爲盟主 必

妃婉孌忽難遷斷無孤掌能遮月不信羣飛竟刺天三十二灘流

不定只愁墮落野狐禪 五月初一日顏君用自南寧返彭城告余此行八九滿意不圖顏

纔到滬十三日彭城發難

### 鈞天

廣樂鈞天曲未終將軍大醉去忽忽爐香夾道雲扶輦露刃傳呼  
夜入宮越國已簽歸命表桀臺誰挽射天弓中興首建金陵策三  
十三人論罪同

壁庵云皇甫規自以西州豪傑不與黨錮所怨深矣然唐玄宗不知顏真卿爲

何人自昔已然但事敗不可不同罪也

### 大錯

我生亦紈袴爺孃驕養慣祇解弄筆硯未能甘藜苳晚年際陽九  
大錯悔婚宦寡慾自罕闕儉德以辟難豆腐日三錢吾力亦易辦  
回首同光朝米價增過半大亂生衣食百年人滿歎

### 有時

有時道服有時緇亂後謀生欲託醫青主方書還有註櫻寧身世  
更誰知杜門惜已今方悔避亂依人肯見奇

杜襲成繁欽語時以自警

自

恨六年滄海客不應七日右丞遺

時充醫學實習館館長

與美國海軍少校巴力士隊長阿魯士交通部沈技監自石  
圍塘乘汽車至蘿岡過蓮潭潭墟植物場步入梅林遂抵蘿坑

寺玉屏書院午飯僧毓芳導游諸名勝題壁丙辰臘八日代朱子喬作

未結荔枝緣

八月入粵荔枝已後期矣

欲赴梅花約微行屏驕從乘興出東

郭難得素心人來自金山舶好讀種樹書旁究養蜂學郊原鬱葱  
蒨蘿岡幾村落世業託蔬果餘畦雜花藥蒔棉土欲鬆種橡膠苦  
薄

時購美國棉子南洋橡種頒各縣試種

時物各懷新風土互商略萑苻苦未

靖雞犬時劫掠自慙職拊循何以安耕穫堂皇笑簡出疾苦多隔  
膜留莠害良苗去棘護杜若步登蘿坑寺洞口石崖嶸山榛含烟  
媚老欖皴雪削寺僧蒲饌獻鹿洞清泉酌逝將買笠屐著我宜巖  
壑牛首夕陽下湛公如可作

山高水長亭額湛甘泉先生題

爲鄧季雨題所藏鄺海雪綠綺臺摹本

我有南田畫 歲寒圖 愛之逾綠綺老革不北來自恨無緣死賣作  
南歸計却慚先生矣

輓弼德康夫人

丁家山下鼓盆歌黃檗枯禪證老婆四十八年災難盡散花不許  
著維摩

孤鸞夢斷檳榔嶼緹騎魂驚七檜樓瓜蔓九原抄不到茅山含玉  
不須愁 葬金壇茅山七檜樓康布政公讀書處

弼德夫人姆教明琴心劍魄女荊卿女兒十八清君側 己酉冬女公子  
同壁電清君側 雛鳳神洲第一聲

不臣女主 狄仁傑盧姨語 不臣新一品霞冠艷飾巾新舊三朝皆欲殺  
飄流海島未亡人

銀塘葬不似金壇多盜西樵墓祭難七十六村采茶女黨魁誤嫁

一汎瀾

爲朱九江京卿請祀鄉賢祠募得九千金置祭田贍遺裔因  
爲長句紀其事

九江東塾兩大儒百年嶺學開榛蕪文筆淵雅推亮瑜漢宋溝通  
尊鄭朱東塾之後華簪裾九江藹落山澤癯兩家學派通介殊子  
弟亦復殊苑枯遺嫠白髮寒無襦簞室廬年八十六歲兩孫赤腳貧負芻  
守祠莫奉趙清獻置田誰爲邢石湖君子之澤尙未斬廉吏難爲  
長嗟吁去年登樓訪遺書乙卯三月與梁任公王協吉謁先生祠見蒙南馬上風雪像

西華葛帔傷惻孤蒙南馬上風雪圖狐裘貂帽鬣鬣鬚國史已入  
循吏傳梁京卿節庵於宣統己酉請將先生事蹟付國史以病革焚著述祇入循吏傳鄉人祇

稱先生廬人鄉詢婦孺祇稱先生祠不稱姓字鱗鱗桑塍遶祠草蕭蕭落葉吹



庭梧生前著述付灰燼死後邱壟荒樵蘇老教於鄉沒祭社至今  
男女異路無樗蒲彥方無人杜密死竿牘媿殺今士夫讀書操行  
有如此空遺清白爲飢驅吁嗟乎康長素簡竹居朝亮茂才安定弟  
子河汾徒陽山築室海外逋簡茂才陽山築室躬耕康弼德題捐千金以復辟又逋亡  
未繳也師門回首莊荒歟無田不祭其忽諸山高水長懷區區我欲  
疏請祀兩廡陳邱聯轡驤天衢恨無語錄供稗販祇留香火私粉  
榆手弄南海明月珠壅鹽冷落山人廚膏馥沾丐崇報虛祭田十  
萬青蚨募負郭一頃魚桑租綿上僅足供魚菽寢邱何必規膏腴  
春秋二祀儻無缺瓠葉兔首烹羊豬黃蕉丹荔醺清酤歌詩學子  
吹笙竽與祭父老刳肴膳先生生不問田舍遺經誰知即菑畬鳴  
呼善無不報德不孤發潛敦薄風教扶祇園布金脩浮屠朱公好  
義今世無朱省長子喬首捐千金提倡最力

謁朱九江先生祠

程氏女史盥薇閣

鳳翼峯頭雲氣紫

初葬西樵鳳翼峯

中有眞儒呼不起龍門北來萬

疊山

山脈自龍門花縣蜿蜒來

西樵磅礴雙鸞峙邈迤平原三萬家桑

園倒灌瀟鬱水

桑園圍障蔽南順西北兩江廣州人物數咸同靈秀天鍾

兩鉅子

駱文忠花縣人

駱相勳名朱理學窮達雖異胸懷似丞相子

孫不自存駱文忠後人亦窮薄

何怪柴桑飢欲死先生學派永嘉傳水

心亦似同淵源

先生最熟明清掌故名物博稽王伯厚

考據家亦排宋學先生

常駁江氏師承記門戶之見意氣籠罩陳龍川

宦晉日上聯關隴策不見用出宰烏

程百九日歸教河汾三十年正襟危坐延平笑少猶勉強老自

然

廖孝廉伯雪言先生少肄業粵秀書院終日莊坐盛暑未嘗跛倚儕輩時笑之今老矣五十年如一

日勉強成自然鄉人薰德多良善學似伯恭氣質變盜牛里少畏使

知聽講菜傭時許見 鄉農進見藹然可親言孝言慈各鑒其意而去 北窗炙輶

雜錄未成書 相傳鈔東塾蒲輪同論薦脩穀分年逋債償 宦晉時借貸

於戚友者分年以束脩償之至歿前一年始畢 宦囊只載端州硯蕭蕭落葉禮

山堂伯道無兒祠草荒遺嫠況復歎周子身後誰知有陸莊羊

舌無後善誰勸庭堅不祀今同傷春韭夏麥以時薦餽餘分與

妻孥嘗人之欲善當如我麥舟指贈猶古道買田京口爲東坡

此事唯聞元長老太賢之後多衰遲豈獨梁公嗟飯顆寢邱綿

上有賜田求之今日已不可櫟園產贖盛此公負郭數畝僅自

保漁洋田購邢孟貞囊金三百殊細瑣鄒崖獨募九千緡高義

尤令人傾倒所慮雲初孳乳多紫荊析鬻遽枯槁後裔豈爲謀

稻梁先賢僅足供香火規約略仿范莊田彝卣勒銘冀永寶 朱子

喬省長議定祭田租入除祭掃外現按兩房均分俟三十年後丁房各半由孔安堂紳老安定章程

鄒崖夫子爲朱九江募置祭田感

盥薇閣

國變歸來日賣田不因壅粥乞人憐欲脩師友淵源錄笑似闍  
黎募化緣從祀例應援涿郡先生嘗請以盧植從祀經註亦散佚傳經藁竟  
火伊川儒林循吏何輕重門胄清寒轉惘然

又

盥薇閣

落日九江口風飽帆如馬村墟魚市散繫纜石橋下導登禮山  
堂嚴祠臂堪把桐子落廊廡桑葉拂簷瓦如聞講經聲溜溜石  
泉瀉不媿儒林鄉誰立欒公社盧文毅駱文忠交章薦鄭朱一  
爐冶人師古難得遺書今莫寫一盞薦山芳弟子歛南雅舊德  
食先疇孤寒庇廣廈鄒崖篤風義庶以勸來者

男  
鴻平

莘莘衿佩臯比擁

廣州城私塾學生常數百人廿一行省所無也

惜少東林講

學風獨有禮山鳴鸞驚不爲章句注魚蟲尹夷自處知難易

先生嘗曰爲伯夷清易爲伊尹任難非忘世也紀阮傳經有異同先生講學宗旨於紀文

達阮文達不肯苟同禽趙未到襄陵任偵劇盜趙不稜黨匿鄰縣南郭酒樓夜禽之鞠關解

州關博士某貪橫公鞠獄壯繆廟數其罪搏頰愧伏狼去境爲文祭山神驅狼不應焚其祠

天大霧募獵戶斃狼百有七害絕過庭耳熟久懷公七八歲時聞演說公軼事輒喜忘寐

男  
鴻立

春水魚花養道心九江人多業魚種俗稱魚花祠前皆桑基魚塘童童桑蓋講

堂陰鄧祠配食憐衰祚襄陵民祀之鄧伯道祠公老而子天亦其識也關廟盟

神却辱金初入晉至井陘誓漢壽亭侯廟不載晉一錢歸粵九道學規時佩誦禮

山學規修身之要四讀書之要五七篇史藁慨灰沉著述七書未成士風吏治如

今日敷衽辭陳感不禁

男  
鴻熹



落落寶綸閣

先生藏書處

遙遙碧玉樓

陳白沙遺跡

永嘉傳一派學

海潮分流

先生學兼漢宋故未入學海堂不欲立異同也

異績同驅鱷知名感

盜牛九江三萬戶呂約至今留

代朱子喬作

淵明蕭灑人有道歸衣食仲長奇偉士樂志寄田宅縱不溫飽  
謀奈爲兒孫役預想牛衣泣爲善多不力有穀乃無穀強辭遺  
清白原顏曾幾人發憤傳貨殖達人困饘粥今古同慨惜饑餓  
我土地無亦有司責適館不授餐豈曰能好德愛屋且及烏況  
乃同血脈重感鄒崖言眷懷禮山澤門胄況式微使我心惻惻  
邱壘荒樵蘇春秋缺魚麥報德有同心解囊無吝色洄酌庶可  
羞盥薦冀無斃不載晉一錢吾宗夙程式告凡百君子無爲羸  
金積學行如先生報施天不嗇無言自成蹊采菽庶有獲匪直



夸文章匪直耀官職感化到鄉氓寧可虛聲飾潛德無弗颺何  
須餒而慙此或非盜泉靈兮庶來格

自題賣騾圖

壬子正月南歸時事

余亦不得已含淚將舍汝忍付牙儉手牽出騾馬市無錢買麩豆  
枯其行盡矣念有犬馬勞寧隨溝壑死鸛駱謠香山賣驢券博士  
擇主當得人買菜求益鄙一騾一馬牽東珠市三日僅購價銀三十圓誠車夫擇主故也  
勿入米堆房磨驢日旋蟻勿上鹽車坂轅駒任鞭箠曾扈蜀道駕  
亦奏唐仙伎一朝輿隸淪胡遽陌路視行過東牌樓徘徊淚不止  
外務部朝夕入署必經之路回頭語白馬似識曹公子馬爲袁大公子所贈以汝  
口三歲自當志千里非驢非馬間聲價颯然起時託故主思益令  
新主喜他日倘相逢跼齧毋越軌

一廬題壁贈劉少弼

觀音山下紅蓮塘故址地三畝

劉郎廿年蓮幕客移家紅白蓮塘側居然野鶴半間園恰似輞川  
三畝宅有池有亭有月臺軒窗三面琉璃開讀書窺園兩無礙鏡  
中魚影<sup>苔</sup>落香來課兒讀律梧桐下繞塘環種雜支栽種花何如種  
樹好一廬六月濃陰裏種花開落會有時種樹子孫食其果夜香  
月季隨地生豆架瓜棚殊草草城北約我卜行窩買鄰十萬無此  
豪檳榔嶼昔持節過閩粵寓公山園多中央樓居樹周遭胡椒椰  
子雜波羅龍牙蕉熟黃成梭留連紫綻荔紅毛毬場地闊剪碧莎  
夕陽兒女羣踏歌人生有命匪由他此園時時在心目一場春夢  
歸南柯頤和浩劫一剎那國亡不死呼荷荷大願不遂如天何依  
人乞食其蹉跎嗚呼吾愧郭橐駝

寧江竹枝詞和胡多浦先生作

三月賣絲客越墟龍潭蠶市

龍潭綠絲最細潔

荷塘豬

鄉人多往新會荷塘買

豬種

金牛坑乳山麻雀 山麻雀巢金牛坑烟綰髻山穴間 石龜肥馬鱗魚

木頭海上接甘竹灘三月鱗魚鮮肥

### 輓孝覺孝廉

賦命縱寒薄豈意罹殃遽稍與余昵親亦爲鬼攫去弱冠掇巍科  
却恥溺章句旁究法盧學分司白雲署諸老折輩行輦下蜚英譽  
倜儻尙意氣名已黨籍注冒險赴時會壯往寡長慮每過拜牀下  
不嫌供草具氣銳自信堅象幻客觀誤早慧見穎高招誘緣齒露  
出入各秉機仁智不相喻昨得南海書會却靈山與密語夕陽亭  
目轉滄江路今始見子心尙未忘故步方歎宿根深不爲魔說錮  
失子知所歸吾道庶得助詎料含沙吹慘聞修文赴有子纔扶牀  
有父已垂暮喪明觸我悲 暎兒同君畢業譯學館壬子爲暴徒暗殺棄海 沈湘竟  
誰訴猶得歸骸骨他日銘君墓

五十

五十原思便乞休况逢國變更何求偶趨公府眞神辱語及先朝  
只淚流不解蔡邕偏哭董某編脩干項城不用死後尙頌歎此理實不可解却嫌王  
粲失依劉天公玉我成遺老勝似車前擁八騶增記余年十七童試不利測命者言十八當鄉舉廿八成進士官至三四品己丑四弟鹿園客死惠州家母日痛哭庚寅元旦禱南海廟乞折官職補骨肉缺憾自誓五十歸養四十八而國變矣官三四品洵前定也

送人赴雲南

牂牁上溯小金沙  
旸雨獐雲總一家  
好是碧鷄金馬路  
春風營壘米囊花  
滇桂軍爭全在罌粟花

丙辰四月祝長素先生六十壽

大地汗漫三環游  
一身飽閱千百憂  
一日足抵人十日  
百年牖下眞蜉蝣  
大名鼎鼎震環球  
等身著述輕王侯  
人生如此將何求  
勸

公一觴可以休當時倘死華寧街頭瓦安見白雲蒼狗紛悠悠不  
然長安大索已三日刊章懸購書生頭白石摩弄芝罘舟郎璫鐵  
索拘楚囚燕市朝衣啼啾啾弄人顛倒迷黎邱脫然劫外非人謀  
何期桑海飄浮漚國門生入容夷猶名德期頤亦可羞家散萬金  
買死士弟子徐雪庵事黃昏挾弩彈鵠鷖柱下悔活七百歲兩朝感遇  
更殷周何取大椿八千歲兮爲春秋憶昔識公歲壬午京兆秋試我  
年十八公廿五而今同爲亡國臣白髮相看淚如雨不聞天子讐  
匹夫豈有逐兒怨慈父素帷四壁風騷騷寒燈夜半屏人語甲寅人  
日阿賓律道夜語辨義頰頰聲如鐘拍案癭頸氣吞虎先生何爲太自  
苦出門魑魅即瞰人且食蛤蜊知何許葬母七日歸西樵移家避  
亂來歇浦沈子培胡琴初況是素心人指天畫地商今古頻年招  
我山中書若海使桂過粵述沈子培切盼赴滬公亦屢貽書敦促朝裘典盡無資斧

吁嗟乎抱琴不能爲湛露謁陵不能爲炎武晨唏夕喑竟何補借  
公杯酒澆我胸並世人材屈指數廿年家國興亡事付與先生編  
年譜 附錄沈子培戊午四月又來書云盼公與毅夫速來成敗在此一著倘天不我祐乃歸死荒邱斯  
純臣之志也

瘦公繩程郎豔秋索贈

青衫靜婉邈含情盪氣迴腸曼引聲自喜超然蘭壁外 京伶梅蘭芳賈壁

雲各樹壇幟士夫有梅黨賈黨程郎蓋超然派也可能風度似瑤卿 青衫以王瑤卿爲正宗

人材寥落在梨園合把檀槽唱罵袁 袁督直禁津伶不讀京師樂籍說

無端打鴨却驚鴛 龔定庵有京師樂籍說

侗五風流海上筵淒涼法曲故宮傳生遲不與排雲讌五品冰銜

讓叫天 侗五爺去年到滬粉白登場王孫末路可嘆也頤和園排雲殿劇場宏麗譚鑫培內廷供奉

賞五品銜



鄒崖遺稿卷四

順德何藻翔翹高著

松柏篇壽節庵師傅

宣統四年賜歲寒松柏楹額故以命名

君不見日觀秦松鬱葱蒨  
歸然劫火排雷電  
蜀廟漢柏冥孤高森  
然大節凌霜霰  
根柢槃厚黝然蒼  
滄桑閱盡老不變  
沐浴日月元氣全  
槎枿陵谷羣陰戰  
人中松柏古所難  
榮枯瞥眼春華賤  
泠泠謖謖穆如清  
松風閣憶携賓掾  
賜穆如清風額  
輪囷不愧後凋材  
御筆眞爲壽徵券  
於戲先生柏臺彥  
十年樗散江湖譴  
喬木空生故國思  
勁草不爲疾風顛  
清時薄植濫棘槐  
大厦危支須楨幹  
搖落漢南楊柳悲  
託思山下靡蕪怨  
讀到南山蒼蔚詩  
牢耶石耶猶扼腕  
昨日東陵種樹歸  
補松十萬餘悽戀  
紫乙沈沈帝座昏  
朱鳥芒芒南極見  
貝多經寫瘡禮禳  
靈壽杖頌腰脚健  
采薇遺老紫芝翁  
看雲

同到慈仁院蒼髯拂拂笑如戟鱗甲森森銛似箭未免斤斧得天  
全疊遭盤錯令人歎洞幽只有蟄龍知試火不妨良玉鍛孤根入  
地茯苓生浮蕊蔽天蘿蔦纏金黿舊夢松雲迷白髮苦心冰壁噉  
吁嗟乎鐵石肝腸人幾見蛟飢虬瘦神醇鍊混沌元黃爭一綫此  
心不轉天終轉

附錄鹽薇閣程夫人作

江湖起廢護崇陵白髮孤臣淚滿膺生日難逢天貺節知留耆  
碩佐中興

承平賜壽憶翁孫同蘇家鼎毓慶延釐拜上尊今日愴懷靈壽杖  
夜鈔大學進宮門

先生頗似顧云美燕寢松風懸御書屈翁山壽云美詩煤炸胡同舊  
賓客戊申八月問何如六十詩戊申八月去衣賜壽煤炸胡同

禮部司務某君六十壽辰索贈

今日與君論禮樂祠宮法物不勝思那堪滄海揚塵後重話天壇  
從祀時許李笙歌豪北里司務少與許李二公子游八閘效崑崙奴故事梁杭雪羅

筱豪

裙屐盛南司璇宮一晌鈞天夢甲午皇太后萬壽襄辦慶典尙璽曹郎

鬢已絲

爲曼宣題康弼德長素丁巳五月圍城中吟卷後

天門折翼夢中哭銀河倒傾日車覆復楚力盡申包胥報莒心同  
柱厲叔九詔車中墨未乾中興草草天亡促風雷不起蟄龍蛇網  
羅無路飛鴻鵠聊城編管且行吟日午蟬聲森萬木我亦場中竿  
索牽手把新詩忍卒讀廿年海外一逋囚萬金懸購書生頭棄婦  
下堂無再返豪奴劫主窮姦偷哄人孤寡學堯舜大力夜負藏山  
舟過譽操莽有慚色獎亂象盜痛神州國變生還偶然遂賺得大

地三環游二十四朝鼎革史無一義旅先民羞肉食者鄙無遠謀  
篋藏先帝衣帶詔三寸舌掉東諸侯胥靡罪臣終復夏杜吳市儈  
猶思劉奉新首義推盟主黃龍揚旗執金鼓十三節度白馬刑焚  
香敵血相咒賭寧知人心有山川無端翻手作雲雨弟子先操入  
室戈諸將偶立沙中語南苑飛車霹靂驚百官星散空朝宁委蛇  
東海持兩端甲第南池成一炬蒼黃蒲扇出東華望門投止知何  
處夜半軍中策短轅玉河橋西今桃源先生兩犯國事出外使爭  
來相問存不恨老革肆毒打只恨諸帥肥食言乘人之車數十年  
北走南走奴孫袁逋臣放逐冤戴盆仇讎草芥容相原骨爭投地  
紛鬥噬物還故主息呶喧不嫌迎立異族主寧惟感激先朝恩魯  
陽逆天欲迴日景泰妒功爭奪門長白王氣今豈盡字字血淚爛  
斑痕我時臥病聞國變天子蹢踖驚下殿簽表未及建炎迎濺血

猶思蕩陰戰奉天扈蹕惜無人司隸官儀不再見今朝得讀公行  
卷十日圍城恍覩面肩輿紫禁狼狽歸事敗亦當得佳傳戊戌維  
新半是非疾風勁草今方羨要君賣友何紛紛筆札雖工土苴賤  
激昂如讀正氣歌捲土重來望羣彥

附錄盥薇閣題詩

此亦一篇亡國史百無聊賴且呻吟不能舉義羞遺老難得乞  
師有逐臣屏後闇窺亡命客眼中誰是中興人彭城璫札芳塵  
積隱語迷離記不真

溫副憲毅夫胡閣丞琴初兩年函札數十商略時局皆隱語塵封蠹

蝕見之泣然

壽雨荃同年六十

東莞遺民自古多江南飄泊意如何家居松柏文章老

著松柏山房駢

文世掌酥醪道氣和

雨荃繼尊甫主持酥醪觀

五季亂離還託諷

著五代詠

史詩千首 一朝人物肯蹉跎回思度牒宣南寄早識黃冠兩鬢皤 光

緒壬辰寄贈余度牒法名永高爲今黃冠之讖

### 爲毅夫副憲題杜鵑圖

誰畫背時花冷艷照紅雪是我眼中淚是君心頭血此淚有時乾  
此心向誰說 壬子人日送君游說東諸侯臨別握手於關廟海棠花下所言至今一一皆驗 見  
者詫不祥忍縱風雨折費盡東君力一霎空華瞥留得方寸春花  
魂不可掇 三年苦心血幻成七日空華

### 再題杜鵑圖

斑斑不似湘妃淚渺渺還疑蜀帝魂獨抱丹心春晚晚淒迷碧血  
月黃昏飄零尙藉東風力攀折無移故土根流轉春光渾不定人  
間可有護花幡 張紹軒入覲太后曰宮中有老米飯喫還藉諸公在外之力君臣對泣不能仰

視



三題杜鵑圖

杜鵑枝上杜鵑啼風雨無端花亂飛  
爛漫春光怎收拾空庭躑躅不如歸

杜鵑花又名躑躅

滿地燕支暮雨寒鶴林人去淚闌干  
玉仙洪福春如夢滇蜀蠻花不忍看

曾咏豐臺芍藥篇慈仁寺院牡丹筵  
而今花市無人問歸向羅浮種杜鵑

龍友桃花思肖蘭風流點綴舊江山  
此花不入離騷賦留寫溫郎淚點斑

畫師吮筆久沈吟易畫花光難畫心  
婀娜無知還有恨前生我亦一冤禽

附詞人月圓

從今淚眼無晴日併作雨中花落紅時節踏青人去尋徧天涯  
鶴林舊夢化成冤魄吹散瑤華泥金屏幃幾曾畫入富貴人家

過南園示脩志局同志諸子

抗風軒左蔚烟蘿自昔遺民此嘯歌五子風流遽寥絕百年掌故  
費編摩

阮志至今已百年

趙劉城闕都堙滅

時拆城修馬路古蹟剗除殆盡

黃郭

敲殘漫網羅

黃志郭志不可見

今日續篇難著筆廣州忠義宋明多

辛

亥國變死義寥寥紀述無色

節義文章嶺表尊豈徒風雅重南園赤鸚鵡賦眞才子黃牡丹吟  
好狀元軒柳烟荒亡國恨祠槐月冷故宮魂

三忠祠傍

西菴書表歸

濠泗漫作江湖詩客論

時西南自主疲於兵令人思孫西庵之功

蘭池農部十丈八表大慶重宴鹿鳴御賜德齒型鄉扁額恭  
祝

人生八十何所求功名富貴眞浮漚廉靜頗似孟公綽和易無如  
馬少游晚年得子萬事足不夷不惠何怨尤人人安分知足皆如  
此天下大亂可以瘳生逢堯舜亦何幸但願民無嗟札宮中安樂  
長無憂天生福慧古未有餘技擘窠飛白筆力迴萬牛草莽未效  
衢叟祝純嘏叠荷恩言稠朱書黃絹懸金薤鸞翔鳳翥盤螭虬  
竹隱區榮德祐賜松風字異思陵售白雲晝結龍虎采赤珠夜炤  
珊瑚洲內廷侍從恩賞驚異數況乃江湖歸老承天庥傳觀鄰里  
鑠聖藻泐諸家乘珍圖球回想綺歲桂宮遊屈指剛逢花甲周中  
興正當全盛日文緣裙屐多俊流青衿轉眼今白頭潘曹甲第空  
文藻盧葉池館成墟邱中年體弱朝簪抽洞霄管領湖山秋同年  
疆吏羔雁投草廬過訪紆鳴騶東山絲竹魚珠石北海琴尊煙澗  
樓皋比主講禮數優五嶺政俗常咨諏杜密定學寒蟬噤嚴公時

與浣花酬三朝治亂猶在目江山風景新亭愁新亭愁朝事豈知  
誤傅亮老臣久已經譙周東華欲續夢華錄桑海空添海屋籌嵩  
山四友終貽笑華林九老今罕儔勸公酒爲公謳茶甘飯軟儘自  
由名德耆頤古所羞王琨歎不如蜉蝣黃冠白髮兩髦留不學王  
官表聖歌休休與世無忤容夷猶古來法變道不變是今非古眞  
楚咻車服禮器存魯鄒少年浮薄前輩謗道德淪落風俗媮煌煌  
天語闡微幽靈光巋然天南州伏生九十承明詔尙書口授猶咿  
嚶

附錄女寶箴作

耆德榮膺天語褒御香重拂桂宮袍書成倒薤紅雲護老再簪  
花白髮搔羊石文章金石壽鶴山聲望斗山高他年再赴瓊林  
宴曼倩知應賜玉桃

四字璿題抵萬金謳思即此見人心早辭簪笏尋丹訣晚臥江湖佩玉音戀主嘶風猶老馬避寒回日有南禽三朝及見昇平事銅狄摩挲感不禁

千佛名經佳話傳而今已廢鹿鳴篇不勝橘叟談棋感尚說公車待詔年丹桂斫餘金粟影黃槐望斷孝廉船留將文謝題名錄衣鉢休教誤後賢

霓裳重詠鄧中丞

鄧和簡宮保重宴鹿鳴

宗伯南齋寵易名

鄧和簡李文誠

均國變後賜諡

歸養自甘員外置錫釐偏荷御書旌人倫模楷經宸

定士論支離屬老成近接德星千氣象

時居城西十五甫與公對門重陽

節後菊觴傾

甲子金陵秋榜開削平大難首掄才再逢下武

公中補行甲子科舉人同

治中興時也

中興運當復東塗西抹來玉几朱衣天北極黃雲紫氣

粵王臺秋曹舊侶今誰在唐律從新細品裁

題畫

舊僞松雪挖去重裝池

印波將軍愛書畫古畫輒能辨直假宦蹟不出蘇淞間眼底谿山  
儘姚冶不愛營邱劈斧皴不愛房山潑墨寫舊聞停雲善青綠兼  
參黃鶴煊紺赭吳中見此眼忽明青嶂紅闌竹露瀉潤聚金碧烟  
明媚水木清華秀而野冲融倒影峯侵湖窈曲藏雲松覆瓦倚石  
聽泉白紵巾行逢蒼雪臂堪把南派秀潤北雄奇軍中攤卷論高  
下元明舊畫多無名文仇賸題却傷雅暗中摸索當自知似非俗  
手臨摹者鷗波小印却磨剗買王得羊今已寡匪薄今人佞古人  
肯教以馬喻非馬紹興太守索我題荷露和墨隨揮灑青松紅杏  
卷麻沙朱王詩價重蘭若

壽朱侍講聘三

汝珍充德宗實錄畫一傳總纂



不負科名能幾人嶺南義烈首張鎮孫陳子壯閉門只述先朝史隱

市誰知侍從臣舊議焚黃釐實錄己酉陳請釐正戊戌庚子實錄君家淙碧

嗣芳塵清遠朱學照殉節淙碧軒西池蟹肥菊瘦新霜後自壽一觴休厭貧

### 壽黃協領鑄山八十重逢花燭

百日羽林兒公生未百日父殉廣州英兵難得蔭生八旬花燭期重談朱果事

相對白頭時海外神仙藥公子宣廷曾充意大利使臣房中饒吹詞潭潭

都護府署左司都統家慶國恩思

### 不寐懷剛甫左丞並柬次侯右丞諸子

秋稼今何如頻年河決患賣書買牛籽宦囊耗過半濱海得斥鹵  
客作習欺謾淡薄難收拾坐爲斯人歎去官已七年故山歸何晏  
南人久北食葱蒜習頗慣只貪帝畿近寧隨門客散饑燕眷舊巢  
疲馬戀破棧笑我南飛鶴不逐北征雁肯索胡奴米待裹子桑飯

賣田無人問 以抽捐過重 藏書被賊篡 去冬鄰盜藏舊書過半 有母不能死

況復遭家難 大兒鴻景爲革黨暗殺八弟堅生爲劣生何翼賄武營誣殺 萬國苦米荒

環球大荒安南暹邏無米入粵 范甌何足算慘黷干天和上下魚鳥亂 西人天

文家測算廿六日地球與日球火星相觸散必有火水風雷大變 果遂杞天崩墨墨同昏

旦十二萬年後重理此公案

### 寧江雜詠

居近泊鄒崖崖下弄海月一領破簑衣江門有衣鉢

七月賣禾蟲九月禾花雀何必大官羊南食亦不惡

巡檢舊衙廢 馬寧司巡檢署辛亥廢 鳴鴉夕陽弔桑艇寺前淥 寺廢而淥仍名寺前

榕蔭太尉廟

午雨始放晴蜻蜓聚成市趁時各營食塘均覓蟲蟻 村童謂蜻蜓趁市

有人賣新絲無人糶舊穀但見桑田悲不必禾黍哭 同治後我鄉田皆

變桑基魚塘

行過滌塵亭手弄滄浪井風雨紙錢灰山鬼飛蚱蜢  
滄浪井在滌塵亭前

村童言蚱蜢乃鬼變者

海底生石馬西流日沖激沙頭崩一丈沙尾漲一尺  
石龜形如馬南沙頭崩數十丈

誰遣金花女來嬪南海廟拾遺嫁伍胥俗語丹青笑  
俗稱南海神姓祝名

赤其夫人姓翳名鬱又南漢金氏女溺死仙湖封金花普主惠福夫人兩不相涉土人塑像爲神妻可笑

女怪今冬雪綈袍尙如故不知因米荒狐裘付質庫

逢袁便當止早受雲門戒未棄手中薇且食肉邊菜  
不仕而受志局月

薪猶持齋者喫肉邊菜也

近得養生訣淡食仍帶飢兩年亦不瘦但畏老人知

哭梁文忠師傅  
己未十一月十四日

雙溪墓祭後 己酉九月祭梁太公墓在白雲山雙溪寺後 南北遂永訣病中忽夢

公不語但哽咽別後我行事幸略向公說 七月寄京書 不然九原下

兩心相阻闊夷齊非扣馬何貴采薇蕨文陸非從亡何難老岩穴

復晉說周虎反唐仗仁傑此義託江海此心揭日月病瘡天下哭

起甕古無術 公病風癱一年 亦知證不治臥閤冀暫活後輩庶有歸正

氣不虛囁豈無再世興胡遽一柱折受諫無今禍回思憤所切一

暝公無憾國亡官轉達朝衣入宮府解璽奮英烈經筵謇謇忠負

展鞠躬節礪松摧罡風陵樹灑碧血葬宜梁格莊魂魄永朝謁 遺囑

果葬梁格莊朝衣二句指黎元洪退位事

庚申人日林樸山孝廉約遊花埭余以事到遲客散茗談而

已明日樸山以詩索和因次其韻

風雨入除夕寥寥江上春 滇軍警耗遊艇寥落 交深知酒淺 余素不飲酒璞

山不强也 人舊愛詩新聽水消塵夢 玉臣舟中午睡 看花悟道眞倘無  
婚嫁累來作灌園人

纖月河堤上酒闌殘客添茶香浮雪碗燈火颯風簷諸子一時秀  
溫伯昆仲 乃公三樂兼歸舟烟水闊魚石屢回瞻

送梁文忠師傅葬梁格莊 即種樹廬故址

後門風雪鼓樓鐘 居福祥寺胡同後門鐘鼓樓西北 哭望泰寧何處峯十步

園牆江令宅 種樹廬在景陵宮牆外 百年心事茂陵松思歸欲弔流花塚

紹武君臣塚在流花橋北 誠子長爲賣菜傭 遺囑語 它日朝陵分麥飯五

雲龍虎護重重

奉梁文忠木主入祀嶺學祠

十朝嶺表兩文忠 駱文忠秉章 只恨中興運未逢崖海不須祠信國

玉山自合配雲淙 陳文忠子壯 摳衣北面瞻冠冕 廣雅藏書樓 講學東

林憶鼓鐘香火濂溪留一席南皮魂夢得過從  
姚文焯議撤濂溪祠公力爭

得留今奉祀張文襄木主同人以雲淙句議以公與陳文忠合祀南園

### 二月初十日李文誠入祀嶺學祠感賦

十年汾水兩文誠  
戴文誠鴻慈亦佛山人故主恩深許易名元史秘聞讐

醉隱  
公註元秘史攷證耶律文正雙溪醉隱集甚詳文山上第出深寧  
康長素會試出

公門下與徐桐力爭始中築圍石角關陰德  
劉忠誠督粵倚任公築石角圍捍西北江民

奠厥居明年得子人以爲陰德之報疏諫頤和有直聲  
諫阻頤和工程忤旨歸養十年卅

載南齋老供奉九流學貫有公評  
節庵題公像學貫九流公又注進四庫書目表癸

未歲余有手鈔本

### 壽梁夔譜先生配室劉太夫人 哲嗣少穆進士

閨閣能爲制義文宋明以來曾幾人稍知風雅弄筆硯刻紅翦翠  
徒紛紜君不見曹大家又不見左貴嬪詞賦雖足鏤金石經義豈



可論釵裙亦有耆儒窮年苦咕嚕東塗西抹猶未窺其門況乎割  
股觸壁有至性良由義理深陶薰施帳代夫評史漢鏡臺課子鈔  
金陳啖佛教持鸚鵡咒蓄琴裂辨龜蛇紋國朝賢母亦不尠南樓  
夜紡五經溫機聲燈影陽湖濱卷施閣廠凌青雲就中無如高夫  
人評閱章奏尤稀聞母也明達揚前芬板輿迎養來湘岷案牘眞  
可兼幕賓平江課士春暉靄後堂錄囚勞宵分吁嗟乎方今女學  
日泯勞四書束閣燒爲薪安得女師如縣君八比重張娘子軍

和鄺湛若趙夫人歌

按廣陵趙夫人小腆紀年作松江張氏當時殆爲陳文忠諱然夫人降志辱身以報國難而成夫  
志事垂成而兩心相左血書袒服卒以一死報文忠知非蒙恥偷生者義烈萃於一門其委曲艱  
苦尤足悲也

燕子樓頭刀似雪城雲黯淡掩春月墜樓早有殉夫心犒士請留

殺妾血國讐家難併一身舊寵新歡都斷絕恨郎歧路懷二心教

妾窮途悔失節夫人家世本松江系出畫眉京兆郎聲價蘇揚都

壓倒風流寇

白門鄭

安娘

笑輕狂自來才伎愛名士況復家聲重

奉常權借雲淙作金屋雙棲沙貝艷鴛鴦金陵事去汀漳覆閱牆

那復戕骨肉梅關不守高明屯三洲屢敗纍囚辱高堂白髮竟投

繯二子青年同繫獄贛右誰招信國魂閨中欲效包胥哭釋俘豈

意盛供張殮母猶思心折服北車監護詞張英佟李猜嫌釁已成

不探虎穴焉得子匹婦寧甘溝瀆經年來誤國緣兒女只恨圓圓

乞外兵村裝肯改柳如是道帔生慚卞玉京小宛清涼空讚佛聶

娘媚嫵太輕生袖劍縱能誅李壽墜臺終莫補韓憑君讐更比夫

讐重齎志黃泉恨不平素服却除靈帳撤錦車徑入貳師營不笑不

言常默默銷金帳底酒無力大夫雉莫射如皋花蕊詩偏悲蜀驛登

臺偶見漢官儀，瓠齒嫣然忽。太息燕子箋，殘舊院空桃花扇。冷妝樓寂不堪回首，念家山富貴一場等觀。劇將軍媚內工揣摩，冠巾攬鏡生顏色。反周故事說梁公，娘子軍堪扶半壁軍事。豈宜謀婦人牝雞竟昧爲家，索伏如處女本兵機。侍婢屬垣恐漏師，桑下洩謀蠶妾死楚宮。生子息嬌嗔將軍密，約會師期閫外寧容閫內知。撲朔雌雄幾莫辨，東西勞燕遂差池。抽簪待罪餘悽憤，拔劍明心轉自疑。西望興陵弓劍渺，靡蕪山下故夫思。巾幗豈能干大計，江山只恨混華夷。血書袒服留遺囑，蹕扈蒼梧盼義旗。青史死夫多烈婦，蛾眉尸諫古來稀。將軍覽書投袂起，嗚呼美人由我死。昂藏七尺愧鬚眉，好義不如小妮子。覲顏乃爲異族使，復我冠裳誓蒼兕。有不從者如此，七傭讐身似謝娥。污滅賊功同桂娘，偉九壇賜祭風幡堂。雙棺歸葬九江水。

趙夫人歌次海雪韻

美人尸諫古來無中正陳詞祗跪敷漫歌團扇迎桃葉偏向酒壚  
詈子都溝水東西憐卓女陌桑宛轉彈秋胡廣州四面楚歌急義  
旗東指嗟何及劇場忽見漢官儀漆室空憐嫠婦泣劇場漆室有  
陽秋巾幘鬚眉第一流血痕亂灑桃花扇樂府誰歌燕子樓珠江  
水軍明組練故國山河淚如霰恨奴誤嫁降將軍地下故夫羞相  
見故夫相見恨如何妾心古井不生波白髮懸樛家籍沒蒼梧回  
首雲嵯峨夫讎不報妾不起故寵新歡付流水西子肯隨范蠡遊  
虞姬甘爲霸王死將軍把酒鏡臺邊尙唱同心相府蓮冠帶先朝  
金紫賜捧將霞帔媚嬋娟夫人帳下忽於悒琴心劍膽婷婷立血  
相燈前暗寫成戰袍夜半親縫緝漢室中興會有時軍謀未許婦  
人知告密且防牆外耳殺妻將釁軍中旗蛾眉暗蹙目如電成言

悔遁何中變芙蓉雙鶚黯銷魂桃李六宮啼掩面小像沈檀三沐  
薰參差吹斷望夫君百花墳上梅花雪長照揚州月二分

汪憬吾云

松江張二喬妹想當然

附錄日長無俚苦熱不能出門晨炊告斷小孫復索購新鞋無錢以應給俟下月姑借此自遣得  
詩兩篇殆有王蒲衣琵琶聲然此心空洞想團河上將心事尤難過邊防軍參謀長王君亦知名士  
在京日常過從今逮捕知焦灼作何狀不禁破涕爲笑

### 題邵筱村先生看瀑圖

時塞外赦歸爲同年王崇簡相國畫宣統己酉得於廠肆

故人歸自山海關酒闌乞畫遼陽山山雪春消作飛瀑當流赤足  
弄寒玉中原無此勢雄奇自非荷戈塞外焉見之奇氣鬱勃噴滿  
紙畫境與人俱老矣皴擦純從思白來清空不數王麓臺割取長  
白峯一角雙峽白龍天上落坡石盤坐者何人清時遣戍多詞臣  
偶來聽泉半日坐詩僧時亦約函可金雞昨日得賜環相公相勞



征塵間江山如此足陶寫秋筵悲怨何爲者 吳漢槎有秋筵集 短語題  
贈同年子出山清濁如此水

壽楊舍人吉三母葉太夫人八十代友作

我母今如在計年過九旬東華懷父執 先君與瓊石公同創香港東華醫院 內  
助仗夫人市義捐釵珥登堂慨鼎茵可持丹鳳詔歸奉白頭親 吉  
三曾典誥敕房報效德宗實錄館經費賞二品封典以南北戰事未獲歸養

贈別毅夫 庚申四月

送爾麻鞋去宮門叩聖安謁陵餘涕淚進奉祇心肝轉悔宦囊薄  
而今釀進難西安庚子貢方物益彫殘 庚子梁小山陳簡持等西安進奉去今二

十年曷勝今昔之感

九月十八夜讀馬鳴起信論藕益裂網疏倦而假寐夢入北  
京戲院見梅郎似素昵者是夕演漆室懷春一劇憫余藍縷



喫糠糲摸囊中予錢四十千令登場作末脚余不解音律詢  
出場當作何語梅云但言余乃佛塵江南人不知幕中情形  
是真還是假呢便了余強應之既而覺失身分頗愧悔慮  
座客有相識者夢中得一絕句蘧然覺思之頗有佛理也

歌院無聊乞食身那堪貼末爲他人不知幕裏渾何事懵懂還應  
問佛塵

### 雜言四首

蚌蛤產鹽海鹺習已慣移育江河中死者必過半森羅小狗熊  
臆健毳三寸携上昔里車喝斃未午飯

森羅氣候嚴寒英外部戴諾安公子贈余

一小狗熊及藏約議成携之回南印度火車上半日喝死蓋火車自寒帶一日入熱帶狗熊不能耐乃歎曰

余頑賤不如狗身毒有火鼠不近黑海岸民族有根性反之恆生亂強  
子食參芪殺之寧所願日日言新法復古學堯舜子相乃禍燕哇

季復誤漢禍始家天下微禹吾三嘆

昔我入西藏得蔬難於肉日日飫牛羊渴吻思蘆菹入市錢一千  
僅買葱半束鬻柑自布丹啜液甘如玉物本無貴賤少見愈可欲  
雖有五侯鯖未必如野蔌枉費日萬錢燕窩市島族

西藏牛羊雞豬至

賤唯無蔬果僅有菜菔葱十月有紅柑自布丹販來唯華官食之

尼山刪六經各明一大義大義數十條初不在文字豈必求甚解  
只略觀大意有涯逐無涯玩物適喪志後儒口耳學皆爲稗販耳  
自漢策秀才坑盡天下士

儉德以辟難苦節詎不貞讀書三十年此理終未瑩涵養非有素  
心爲境遇攫胸中了無得血氣胡能平天運旣如此衆盲誰與明  
嘿嘿徒自苦惘惘將何營不爲明日計不爲身後名浮雲堯舜業  
霽月周邵情士夫晚逃佛儒者先謀生飲啄能幾何吾其爲天鰥

題所藏黎二樵畫碧嶂紅棉

二樵生愛畫紅棉過嶺而今幾本傳  
跋云近年畫碧嶂紅棉圖過嶺者數十本矣  
此其妙手偶得者耶光緒庚子售於北京廠肆肆估不知其名也自甌鉢羅室書畫錄出價增十倍矣  
橫胸柴米誰能免心賞相期五百年  
嘗云世人終日柴米橫塞胸中豈能辦此得意時輒擲筆歎曰五百年後當有識者

宣統庚申七月蒙恩賜福壽字

家與國同運七年夢裏身自天聞吉語此後算全人  
永錫憑冲聖高懸慰老親  
頻頻南北走辛苦念微臣  
毅夫覲見天語垂詢曰君輩舊臣南北奔走辛苦

懷槩公

林塘十畝課魚蠶金紫端嚴碧一簪  
龍山金紫主峯端正故仕宦多正人憑與  
龍山添掌故雪聲堂後杜鵑庵

讀南漢紀雜詠寄潞公榘公

天祐當年著作郎奉唐正朔勸劉王通犀腰帶薔薇水齎表如何  
入大梁

陳用拙

桂香詩格滿江湖不減才名鄭鷓鴣如此閑情黃僕射風流天子  
怕狂奴

黃損

刺史何當用武夫肯教清海卸軍符青宮自奏軍中樂可似秦王  
破陣無

楊洞潛五官中郎將模範軍

七千宦寺一忠臣洸口蜚讒亦有因亂久自思眞主出誰當救此  
一方民

邵廷珪

柵口屯軍勢太孤僞朝盡節死無辜九原媿見張承業猶是唐家  
老監奴

植廷曉

過六榕寺題壁

大梅堂下小沙彌

十六歲讀書於此

三詔挂單今復歸地水火風輪轉

徧這腔子裏即如來

在拉薩嘗刻三詔挂單小印

花塔八哥聲喳喳羣呼飛逐番塔鴉鳥亦如人分地界東家食不

讓西家

時粵軍援桂

佛性何曾有南北只爭衣鉢相吆喝門前倒却一刹竿昨夜夜叉

今菩薩

昨夢文殊打普賢可思香火有因緣

軍政府總裁大打架

於今遺老無

歸宿不見天然見鐵禪

九日

秋風吹帽偶然耳廁上高吟氣不羣眼底直無玄子在至今誰似

孟參軍

是日聞孫伍登白雲山

信曾右丞內艱

一月侍醫藥十年羈帝京從亡遵義訓嚙指促歸程母子相依命  
嬰兒失哺情亂離胡可說歸養負虛名

余壬子南歸流寓會垣不得回鄉侍奉南

北一概剛父可無留滯楊漕之憾矣

### 魚珠夜泊送人北上偶感

木落珠江縹渺波烏篷倦倚望銀河京華親舊晨星少末世文章  
秋氣多天上高寒如醉夢眼中人物半消磨隔江兀兀海幢塔一  
一鐘聲落白鵝

### 東海竹枝詞

東海沙田萬頃圍紅霞滿海禾蟲肥黃魚上岸變黃雀去啄禾花  
逐逐飛

### 見雁

白髮無家不自哀吟秋偶上宋皇臺舉頭見雁低頭拜知自遼陽



避雪來

送胡勿庵北行葬母

南歸扶母櫬北葬玉泉山黃鳥逝將去白雲無復還在官持服易  
近制百日後出任職多盜上墳艱歐九長留潁瀧阡亦汗顏勿庵新刊先塋碑

望崖門

言登大雁山東望崖門海潮汐相循環盈虛有時改風雲本無常  
陵谷依然在大化隨流轉毅魄逝不悔一姓自興亡斯人死何罪

題鄧鴻臚

鐵香語冰閣奏議後

莽莽鎮南關相持甌脫間只憑三寸舌哭望九門山

張之洞馮子材電

爭漢銅柱界

許我歸田悔

初法狄使口許歸我文淵高平地戈使翻悔前議赫德恫喝李鴻

章有旨嚴責飭退讓公憤告病辭職

上書謝病還森羅更草約無奈上官辱翔

與英議印藏商約草約已定期畫押戴諾曰君口舌戰勝固匿笑而外部堂官欲哭矣戴蓋電嗾英朱使

威逼外部照第五次稿畫押也夜奉部電余痛憤欲自戕數月心血盡付東流倘先生處此謂之何哉

送圓默眞逸兩道人北覲

燕雁南飛子北征  
河冰未合到津城  
瑤臺鳳去虞姚遠  
石柱龍蟠  
蒙女驚朱果上清  
曾有夢明珠南海不勝情  
大婚粵海關貢方物  
九朝  
漠北多恩澤  
贈馬應聯甥舅盟

附錄慶清朝一調

瓊冊鏤霞紗  
燈暈月氎氈  
春煖金鑾翹  
望雲中天帝錦帔珠冠  
扈從青娥宮監杏黃轎  
子綉雙鸞  
康乾事椒房選秀分付春官  
欽天監內務府揀得黃道日  
正位乾坤憶陪頤和筵宴番婦  
臚歡多少茜裙窄地香巾繡領月華門江湖遠夢中霓羽吹下

宸翰

恩賜福壽字

送溟僧

前川邊鎮守使歸

驀地屠刀放迴心向佛陀詩僧蒼雪少塵劫白雲多鐵塔荒光孝  
寺觀皆駐軍隊珠裝壓伏波黑龍潭上月照汝下牂牁


哭奉新張忠武

七日鈞天夢丁巳五月事三千入衛軍出山頻約我穿塚欲從君許  
劍心猶在槌牀呼不聞魂朝先帝去望斷泰陵雲

自贈

客香島日赴朱門講書似街頭賣曲

花榜秦淮女狀元霓裳供奉祀黎園沿街賣唱蓮花落誰識當年  
寇白門  
駿馬貂裘美少年珠江風月韻紅船而今乞食歌姬院一曲燒衣  
三百錢



鄒崖遺稿卷五

順德何藻翔翹高著

不寐憶母

六十已抱孫視我如嬰孩夏夜涼飈起持衾覆我骸龍鍾燈影下  
婢妾慙如雷此生無母憐簌簌淚滿懷

登宋皇臺

代作

宋皇臺上嵯峨石斷瓦零甎不可識一坏猶是漢江山三字空留  
元筆迹回憶六龍南幸時江潮失守更移師甲子浪高飄海艦零  
丁洋渡懷孤兒官富鹽場一荒島蒼黃猶稱行在所入幕參軍趙  
玉淵毀家輸餉馬南寶小朝廷寄蛟螭窟築臺瞭敵臨溟渤龍湫  
淘恨銷秋烟鶴嶺招魂弔寒月傷春弔古此登臺興亡豈爲昔人  
哀金主墳荒成祆寺楊侯廟破委蒿萊登高四望非吾土二王村

有漁樵來

七夕悼亡廿四日始聞耗適航路阻不得歸

默坐如有失中宵忽放歌艱難有今日典貸無門幾不成殮後死更如

何累汝持家苦知余隱惡多石塘聞梵唱悽感動東阿

隨齋主人石塘侍宴應教三首

十五珠孃惻惻吟石塘燈火夜沈沈岐王妙解龜茲譜知是招魂

梵筴音石塘妓近愛吹竹管長約二寸恭邸一聽知爲梵音

南海何從賦大招座中潘岳更魂消齋堂雲板三更月春夢一場

心血潮是夕適聞程淑人訃

北地背城辭慷慨中山聞樂畏讒疑是夕語及宮闈黨事相逢荒島滄

桑後回憶乾清侍蹕時外使帶見於陸載侍研丰采如昨

題高齋行鉢圖爲崔伯越



我怕做和尚都因乞米難記從爭鉢後南北未曾安安得無盡飯  
此鉢即爭端逝棄許瓢去行行且挂單

讀鈴山堂詩集湛甘泉序辨僞

王孟清才自不凡

嚴詩近王孟

白沙詩教久同參

甘泉亦工詩

如何甘

苦不相喻

湛序泛頌參贊化育泉變相業無一語及詩學疑爲內閣政事堂記不知何人劣筆嚴

氏子孫刻家集時嫁名甘泉

委鬼梁文亦借銜

魏宗賢上梁文署謝逢聖名謝見銜驚託魏

曰借銜耳當時習尙也

自清風臺晚步歸口占

天風吹我髮鬚髻望遠登高得未曾雲裏電車山頂樹雨中星點  
海門燈白衣紗帽今無恙散髻斜簪病未能

聞狩天津事

十載不曾

虀粥斷夢中苦樂互除乘

檢舊篋見清議報偶題

每讀清議報輒憶武安語一部正氣集誰非冤抑死

四句己亥戚梁任

甫語

詛咒及宮廷官場窮醜詆嘻笑唾罵間取快一時耳文字鑱

刻工冤憤挑撥起大盜借聖人桀犬吠非主金堤潰蟻穴橫溢不可止回首同光中千錢糶石米君吏信汚暴望若黃農矣

### 贈莫六

光緒丁酉令叔雲裳茂才約先武翼都尉厚農府君到會同村相墓盤旋半月歸述

其家法之善興未有艾也已亥翔入都供職雲裳親送至港與弟藻泉湘甫招待甚

摯癸巳除夕鶴鳴約喫香山粉果重談家世不勝風木之悲

三十年前孔李交滄桑邂逅島山均羨君海運鵬搏翮老我無家  
鳥覆巢赤雅新編東塾藁白頭重纂北堂鈔上方請劍慚無補荊  
聶相推漫解嘲

莫六以余劾袁慶疏引爲精武會員

高涵叔以其父老愚先生家傳乞題七年鵬之不已率賦以  
慰其意

七載青城呼父聲一篇家傳手鈔成  
掃壇不享椎牛祭肯玷先人清白名

鄧尉山頭哭白雲但聞耆宿苦徵文  
只今銘墓無歐九萬樹梨花處土墳

贈崔伯越

一卷新詞似夢窗珠喉微澀帶京腔  
君生長外省海青雙笛石塘咀  
不遣銅琶唱大江

北山亭看菊

白露暖空秋已老黃英含蕾開還早  
柴桑死後無菊花山中只有寄奴草  
黨人時寄居於此

中元後一夕愚公篴玩月

甲子

端居不樂思月泉故宮禾黍今何年  
紂以甲子亡山鬼窈窕哀中元

重續何郎明月篇  
嫦娥笑我忽華顛  
今月不似兒時圓  
昨宵風露  
孟蘭筵銅鉦盃鼓千燈燃  
出入地獄賽日連百六  
罡星飛上天  
東

海卅六沙有大星墜地光熊熊聲如雷

愚筴主人好事者  
置酒留賓愛風雅  
少年拳棒習少林  
老輩風流  
追汝社會登旂山  
絕頂浮大白  
冷然御風機  
軋軋  
座客有飛機師  
河山  
空相無南北

愚公筴曼陀石畔竹亭品茗

火雲張繖壓天低  
海水熱沸魚驚飛  
林鴉燥吻背日啼  
攪馬汗喘  
向風嘶路傍熱客渴  
欲死樹影在地饑  
啄雞鵝頸橋東愚  
公峪藤  
蘿蔽天森萬木  
虬髯纓絡根蟠榕  
石磴盤陀竹壓屋  
主人讀罷楞  
嚴經綠珠煎點茶  
剛熟竹根白爐紫  
砂壺一盃灌我如  
醍醐石丈  
拍肩大叫呼羅浮  
霧頂擎玄珠心源  
疏淪滌羶腴軒轅  
道士午夢

方蘧蘧

題曼陀石

諸相本非相感觸皆幻妄日病見空華一華一佛像結跏趺坐者  
闍上澄觀萬化隨流浪屹然不動心迴向紺青肉髻螺旋圓白毫  
覆額金光放吁嗟乎須彌破碎爲微塵大地晶粒簸風輪菩薩誰  
知亦鈍根石頭和尚我前身豐干多事立名字笑殺羅浮山頂雲  
臥人

北山詩社同人留祝東坡生日余以祭竈日近門外債家林  
立意非先生丐我壁間懸錢斷不送紅燭桃麵也

南飛鶴欲譜髯仙歲暮琵琶又促絃

王蒲衣事

要與先生賀生日畫

又丐我壓年錢

先生想不能以囊空辭然非先生僕亦不向胡奴索米也

廣州詞

莽莽饑民安上門  
信信惡吏石濠村  
舳板莫彎龍母廟  
肩輿莫過西瓜園  
軍隊擄夫役

鷓鴣也自喚哥哥  
黃屋何妨學尉陀  
樂得閉門作天子  
雕青面具敢誰何  
自稱大元帥

題高蘊琴藏梁文忠手書臨別珍重四字

蒼皇北寄蚘蛇膽  
換得牀頭口授書  
公病風痺余寄三蛇膽一瓶慮公不肯服曰此椒

山先生藥也覆書嬉笑伏枕口授兒劬代書自署名而已  
零落元賓三四字  
孟東野得李元

賓遺墨詩云零落三四字遙遙千萬年  
秣陵無路答雙魚

事未百年人貴惜  
事過百年人始貴  
文忠詩語  
梁康一札兼金易達夫師

友風義深開篋見  
書淚霑臆

哭曾右丞剛甫

靈運天生後孝標  
書到遲  
十日前聞君病寄書云老弟雖夙慧而涅槃終當在翔後乞作



小畫寄我不意書未到而訃聞

南歸不忍見

去年勸君南歸爲謀安筆硯覆書悽然後死

那堪知題墓故官職賣書供藥醫津沽丁侍讀風雪兩靈輜

### 康弼德溘逝攄憤述懷

豈有補天術能無完卵悲匆匆仍苦節袞袞盡行屍耗矣民生痛

魂兮帝所之避遼寧早計

公大連之議

遷許竟居奇

張園侍從主化國爲家

北狩原孤注

余之和林之議

東征又三思

遊學日本議

可憐苔末燕徒學

甕中龜元裔歸沙漠唐高借外師險棋爭國手毒藥畏庸醫安得

河清俟誰知卵累危竝肩袁伏恥徇主庾辛遲逐日輪終覆憂天

杵不支中興無再世明德累期頤賜壽謝恩疏祝宗祈死辭

三月初

五日七十賜壽謝疏語似遺摺

九京梁沈遇把袂益悽其

### 贈徐雪庵題所藏康長素墨蹟後

膽裂魚珠石血沸鵝潭水伴仆硝烟中脫險舳板底天留將有用

賊斫不能死康門大龍象呼嗟徐孺子

題陳仲遠小瑯環演講圖

南洋孔教會

吁嗟仲遠宏毅能任重一生心血唯演孔子身遠航檳榔嶼木鐸

徧徇三寶瓏三畏九思八條目五教首揭白鹿洞

赴石叻時與酌孔教條

目頗注重儀式

摩西十誡溺鬼神迷信儀式刪繁冗柔佛迤西卅六國

華路藍縷開黃種多習蟹行蚊脚書環座鵠立羣聽悚訾誓稷下

田巴遁怯望濕灰壺子恐

反對黨

乘蠟抵隙紛相攻口講指畫屹不

動屋壁僞古關孔梅端以改制尊何董義張三世進吳楚志大一

統歸帡幪釀金應悔助豺狼發甕今方撥蟻蠓引蛇入室自相殺

傳虎以翼誰作俑歐戰以還物力盡貧富相噬勢洶洶四民平等

何軒輊違道干譽姦民寵山嶽燒炭毒燄痛斗米白蓮邪呪啐武

靈變服適漏卮新莽均田徒鑿空陳生捨身入地獄深衣危坐奮

拳棒塗人強聒時謹謹同室操戈胡惜惜旭日翔空陰翳消有進  
無退賈余勇前仆後繼鍥不舍鄒嶧干城斯永鞏

楊茂才伯典獻其尊甫敦甫學部遺著承恩賞恭紀奉題

歸捧縷金箋焚黃告九泉校經臣向進解字子冲編清白本家學  
丹鉛留御筵刊成承旨集仍署義熙年

爲李微塵題康長素致皖孫豫吳湘趙諸帥電稿後

戊辰五月

三紙秦廷淚廿年粵海塵止知同室鬪空恨養癰人急我鵠鵠難  
天乎狼虎仁東南皮骨盡猶復算丁縉

焚商場後計資本勒繳十分之四

宣統丙寅七月戲題醫書後

可歎何員外今日轉郎中

北京稱醫生曰郎中

藥尙君臣識科兼內外

通不如長樂老

甘草別名

也算白頭翁

金匱湯名

快活二千日

星命家預

余六十八歲行歸兜率宮

哭蘇玉衡孝廉

七日一過從小飲隨所之兩人皆六十相懽能幾時忽聞季主聘  
捧檄西南夷親故苦勸阻瘴癘非所宜羸病行萬里寧待卜龜著  
南圖況莽莽礦事中道亦透遲不意滇軺歸聳患多諛辭王竹村勸  
行臨歧不敢送難忍淚漣漣惓惓生竟去矣將行忽語惓惓南田不附覆舟事殆前  
識鬼怕有程期出門纔匝月橫死悲吾兒大兒鴻暉赴瓊州一月爲黨人暗殺  
翁婿同一厄歸骨亦嶮崎

追懷剛甫右丞

楊漕石田那可耕棉湖遺書付誰寄藏書尙二十萬卷不甘乞米向胡

奴買木千金有死友病革某贈數百金不受待友買棺乃斂

述懷祝豫荃同年七十

遺老不餓死貳臣還破家聲名甌瓦裂富貴空曇花

黃浦

僑滬十年

秋鱸戀酥醪

先世主持

夜鶴怨薄蕨喫不盡

君家衣食自足

江湖胡久遜

亂世老人多天心故折磨田園行賣盡朝夕將如何

不爲童子師陪作溝中瘠欲將琴書典端賴知交力

荏苒倏十載少微星不墜

援六十例索詩

雖亦倦津梁幸未斷鮭菜

五福兼壽富如公洵古稀生計託鉛槧崑山乃本師

### 出家

久有入山心而無出家胆妻肉亦能斷披剃遲未敢故鄉屋晝鍵  
荒寺賊夜瞰護法恃韋駝肱篋卷罽毼袈裟穿不成冠巾還被斂  
島佛悔無終駱丞策彼髡年來蝨海外益復入坎宮裸壤市冠帶  
珠米博鉛槧食恥爭雞鶩味苦回橄欖脩脯供廡租朝夕仍頷顙  
餓死亦快事壘鼓未嫌澹雷峯

指天然和尚

失飯依能無今昔感

寄懷莊斯敦師傅示溫毅夫 莊前辭香港大學堂監督入都就今上聘

戈登赫德勛名拜下塵南齋供奉陋朱福詵陳寶琛芝罘祇有莊師  
傳文陸中原此替人

追哭樸仁山 壽將軍 辛亥十一月福州殉節

鮐山城頭墨雲壓海氣沈霾馬尾峽將軍夜盟盤血敵 樸夜召陸路提

督孫道仁激以大義願受敵盟 白旆忽懸朝解甲三千旗兵閔鵝鴨 旗兵環跪

哭求停戰 北向痛哭憤自殺烏呼鳳山狹 廣州將軍履任進署左右勸改道行不聽

被炸彈死 鐵良怯 兵部尙書九門提督統神機營被炸彈死 新疆升三怒皆氣弗懾

電爭國體不署押嗟我同年同官兩義俠 升芝甫壬午京兆試同年樸仁山同

官統署甚相得 劍氣雙芒絳霄插思之媿死淚滿頰

追悼王靜安 國維諡忠愍丁卯端午昆明湖殉節

廿年救國無一策忍令太倉添鼠雀東瀛鬻得書畫錢白髮詞臣



俸米索布衣供奉入南齋五日宮衣承恩澤昆明湖舫賞乘湖船四  
扇蓬翩然一聲墜海石請從此逝逐正則噫吁嘻津橋杜宇不可  
聞遺老對之空歎息

哭梁任公

噫唏噓死矣梁任公經營八表卅年前相謔語氣如虹晚年鍛翮胡籠

東牙牙俚語學兒童南腔北調寫滿紙東塗西抹逞談鋒語體文頗

似反舌鳥又如應聲蟲語錄非朱子方言非揚雄大學講義牛腰

豐擗撻胡蔡衣氎氎博得酒三斗粟十鍾不如餓死須磨中須磨日

鈔編國風在日本發刊國風報三期主張革命爲康南海責斥自謂有後膛毛瑟鐵甲

縹緲草澤崛起無梟雄師乎師乎寧盲從不然革命軍前一騶卒儘

可大言倖中微天功馬廠功名亦安在萬木弟子割席不相容又

如翩然撒手歸虛空嗚呼卅年塵影蟠余胸曾狷叔江孝通習經逢

辰燕市射覆敲詩鐘 光緒乙未丙申間夜夜小飲都一處 四更雪大月朦朧黃

羊白菜餽餽新出籠有時走馬天寧寺左挾彈丸右竹弓賭射塔

鈴風丁冬二豪情態蠖負蜃 贈余湘月詞有云 昔嘗規子筆舌忌太盡

鑱刻神鬼其終窮 宣統癸丑誠君以辦事人不能作文章蚤半鐘宗旨不能宣露後赴歐洲

終以論說開罪於段 地下若見陳驚座 指陳簡持中丞余嘗評兩人同一魂魄能動不能

靜 末路自悔將無同 簡持將歿時誦吳偉業金縷詞流涕

### 悼黃仲谿

丈夫乞食尋常事負氣出門向何處淞濱流落故人子初傳海外

去爲僧 近與檳榔島一僧往還 去月纔聞蹈海死赤手起家二十萬我得

我失亦何恨不肯低頭再向人生平久薄錢神論憐我無家雞黍

招他生冥報懷一飯 壬戌癸亥間旅港每七日承招飯

### 餘生

餘生復幾何明年六十六作惡力不能爲善亦不足少誤詞章學  
義理罕蘊蓄晚更元黃變心境苦縛束出門無所詣獨居常仰屋  
明知憂傷人無那甘天祐雖欲強排遣無端復牴觸螳蜋震聾耳  
空華生病目默數生平惡棄親徇微祿廿年何所得百身今莫贖  
急來抱佛脚楞嚴奧難讀夜持報恩咒庶以資冥福戴罪許懺悔  
淨土有歸宿

鄧生爾疋藏鄺海雪綠綺琴近卜居大埔以名其園

悽絕葉金吾

猶龍舊藏

相將屈左徒

一靈

囊琴攜海雪夜月彈豐湖

七古見詩外

雲彈昔同弄沁園

葉名園

今已蕪故家宮羽換補入誦

芬圖

鄧廉訪詩誦芬堂集

廚娘吟

夫死矢不二肯嫁波斯賈貪赴跳舞場弗耐冰檠苦出塞琵琶聲

歸漢胡笳譜裸國無冠裳聾垠無鐘鼓頗怪碧眼兒好娶再醮婦  
只涎兩家奩不嫌白頭佬自憐顏色好問年纔三五漆室聞夜哭  
侯門侍歌舞身價十斛珠注籍鴛鴦譜地下見故夫妾身問誰主  
分作廚下娘百錢日傭雇

辛倣蘇旅櫬南歸

卅載梨園舊主人

爲京伶二奎贖身充四喜班主設質肆散萬金

千金鬼趣黯銷

魂

藏羅兩峯鬼趣圖近已竊去

隱侯末路頗相似

羅瘿公死燕市醫藥棺殮資皆出程艷秋

只有歌伶解報恩

七十

七十懸車當告休天心不死屬譙周殘棋險著那能避完卵傾巢  
寧久留月俸南齋書畫賣薄田陽羨子孫謀落花春夢憐身世桑  
海茫茫滄趣樓

某公語徐善伯勿妄動閩中田宅固將不保上頭更無立脚地其肺肝如見矣

滄趣樓有落花詩十首

庚午正月十三日學海書樓祝嘏

江湖望闕祝釐辰白髮遺黎尙幾人  
驀憶外臣牌帶進上書房裏獻香楨

官外部時是日常帶領各國使臣入賀賜宴上書房

秋蝶

金粉褪春黃蘼蘼夢一場  
草間且偷活何意炫文章枉費東風力  
辛劬獵衆芳

病鷹夢至遼陽作

出塵英鷲姿瑟縮成寒蠅  
見獵心猶喜厲吻啄疏翎  
飛出燕支塞隊逐海東青

與客論謝康樂事偶感

先朝勲裔招時忌藩邸賓僚玷黨名  
浪話魯連甘蹈海可曾龔勝

却遺生

臨刑詩

家奴只解作山賊名士欺人無宦情冤獄祇今憐

范曄將門有後愧淵明

康樂冤獄頗同范蔚宗文人之極厄也謝玄陶士行竝晉名將康

樂乃不及淵明者謝質產豐厚家奴門客衆也

追懷李洛譜師

壬午孝廉順德大門人與潘雲程馮蕙裳李辛邨皆一時名孝廉

潏潏碧鑑

河名

水奔流入大門巖巖舊寨山回抱羅兒孫靈秀毓

耆傑朱陳有淵源

少從朱九江遊及設帳光孝寺時朔望往學海堂菊坡書院聽陳東塾講

史漢讀爛熟書易從討論詞賦信翩翩踐履乃醇醇至孝竟無後  
著述焚不存三年六榕寺哭寢無諛言

太息

一朝嗜利一朝名盲晦從今轉霽明燕市歌伶

程艷秋殞羅癭公多義

俠巴黎舞妓半公卿

鄭毓秀輩

六經道盡聊逃佛薄海民窮只養兵

太息孔林都籍沒南華盜跖有公評

孔廟祭田查抄入官



追懷吉勤那將軍 二十一韻

英侯爵吉將軍統帥印軍三十萬性癖嗜古瓷儲藏頗富光緒卅二年余使印參贊與印外部戴諸議印藏商約偶因事謁吉一見如故時招午茗倩西醫官全希聖充繙譯唯談古瓷不及他事盤旋十八閱月贈余元製火器每冬獵獲雉兔必相餽報以青花碟印合數事掀髯大喜瀕別以電影標本圖託購藍黑胎三彩樽瓶不惜重價未易邁也辛亥國變後音問遂絕宣統丁巳歐戰禍亟英廷調吉帥印軍入衛德人於南非一役聳忠特蘭斯窪抗英獨立賂以軍械終不敵吉深忌之以爲此次軍事吉死則英易與偵騎密布吉亦深知而詭避之不意抵愛爾蘭後甫離海口帥艦猝遇潛水艇而炸遂殉焉余以亡國餘生憂傷憔悴知交死喪略盡聞之欲哭無淚比年萬念灰冷荒島埋名既痛逝者行自念也

手提卅萬軍焚香讀陶雅康乾青花瓶雜陳鈴閣下生平金石癖  
美人粉黛假 五十不娶指架上瓷曰此即吾愛妻也 廿年軍俸入盡付玉販賈  
宋元精鑒別磚瓦供搏撝螭頭德宣爐雞血成化罽窰變玉觀音

紫釉翠濃瀉

以上吉所藏未及百一

相逢天竺間緣結香火社通識兼文

武知己無夷夏揖客將軍寬舌人醫官借笑言支那帝聘我牧邊  
馬御府所藏弄審器恣弄耍提督滿蒙藏月俸不言寡北遊帕米  
爾太上庭焚赭

言十年前游帕米爾俄勢駸駸南下中國非練馬步軍三十萬不敷防守英非

圖佔藏爲防俄計藏失則印不能守矣

東邊夏威夷不祥金躍冶伏遇潛水雷

樓船葬人鮮奇才邁奇禍赴義生遽捨嗟我亡國奴玉碎愧全瓦  
日食米半升築無茅一把玉照影模糊金鑄心陶寫身亡國不亡  
自顧何如者

香港教育司羅富士言吉歿後所藏玩器亦不知落誰手

六月十六夜牀上口占贈別英港教育司羅富士戲效俳體

石塘金陵賣酒家

漢文夜師範教師公謙送羅別於此倫敦歸客乘星槎高樓

燈火照天半鏡光人影攝烟霞燕窩鶉脯鷓鴣粥一盃竹露歌淦  
巴三萬海里使支那二十五年期及瓜

英服官年滿例給長俸

年年恩俸

五百鎊虬髯未白眼未花三島休去歸桑麻中國實業方萌芽羅  
兼實業科長 那不令人長歎嗟憶領月餽參齋衙百金未足供瓜茶

蚊脚紙尾押塗鴉問我結交吉勤那幾年天竺歌黃華漢語未熟  
聲聲牙忽指架上笑啞啞秦磚漢瓦紛羅葩舊籍破碎版麻沙芝  
英倒薤蟠螭蛇壁懸高麗人飛白體書束裝歸國載滿車樓船萬斛下爪  
窪蛟龍雷電來攫拏我今欲歸無田又無家效村學究欵烏紗送  
人歸隱背癢爬因羨生妒不我瑕

小女寶箴鄉間來書漫錄其語

果木如人有盛衰開花怕遇惡風吹八哥樹上相呼語楊鎮今年

無荔枝

兒時習聞母說樹上八哥鳥曉相呼往麥村楊古鎮喫荔枝三十六鄉相傳唯此老樹黑葉

最有名方墨谷孝廉食之驚嘆曰此掛綠種也埋沒二百年無人識可慨也小女春初揀樹定購而遭荒  
歉信飲啄莫非前定也

米貴書寄爾雅

至人洞元化沈幾觀物變嗜慾苦不給巧力暗相戰蛟鯨食鯉鯽  
鷹鷂搏雀燕冤憤積日深瑕釁覬乘便慨自汽學興米貴傭率賤  
自光緒十五年至辛亥米漲四倍三百年所未有當道憫然 廝役無舟車織婦無鍼線  
皆舶來品 村農一食艱市賈多財善貧富太相懸苦樂當遞嬗非經  
闖獻亂那得堯舜禪混沌竅鑿死七首窮途見天地一癰疽椎破  
血被面世界大革命豪猾流言煽斗粟糶百錢朝夕官廚餽黃金  
成泥沙大酺三日宴我欲乘飛車五洲瞬遊遍

附記 光緒戊戌爾雅從余讀書蘇氏晚翠園歲飢石米價銀二圓五毫四鄉皆賑粥余語蘇棧

農曰米貴步步高若上樓梯然恐無復下之日械笑曰先生真不知稼穡者老父嘗言佃戶批耕  
以穀百斛價銀一圓爲標準若穀價常沽二元五毫貧氓豈復活耶不幸余言中米價竟漲至十  
圓眞無死所也夜不成寐書此寄爾雅

附盥薇閣詩鈔

蠶婦詞

光緒癸未作蘇樸洲詩話選錄

大婦竈側迎蠶孃小婦洗手羅酒漿中婦窈窕獨艷妝東南宅  
角揄紅裳喁喁私祝知何語五畝餘地千株桑蚝蟄虻虻盈簾  
筐屋無鼠兮田無蝗田婦飼蠶如飼子蠶飢則憂飽則喜初眠  
嫩小畏風寒門遮敝席窗糊紙夏來三日雨不止桑葉黃落傷  
潦水米價爭同桑價起搜盡蠶匣典簪珥徬徨東市買桑歸箔  
上蠕蠕幾瀕死一月十日不梳頭飼蠶纔罷饁西疇農夫朝朝  
常薙草農兒暮暮常牧牛終年辛苦盼蠶熟三眠四眠齊上簇  
繭成縑絲織綺縠五色爛斑艷奪目打門租吏來敦促泣抱新  
絲墟市鬻鬻作豪門歌舞衣田家原不稱此服

淮陰釣臺懷古得臺字



茫茫烟水釣魚臺落拓王孫信可哀渭水得璜空有夢富春傲  
世愧非才斬蛇眞主雖相遇烹狗功臣亦自裁若使名成便歸  
隱五湖應繼范蠡來

西京宮廟委塵灰高矗淮陰賸釣臺糠粃有人猶不飽頡羹無  
嫂肯相哀蘆中漫翮投金報袴下終羞帶劍才一飯倘非逢漂  
母早應國士死蒿萊

秋柳和王阮亭弔衡府宮人作

西風一夜入長楊萬縷千條盡染黃隋苑絮飛尋故主章台信  
斷盼蕭郎獨憐瘦馬嘶殘月尙有寒蛩訴夕陽昔日青青無限  
好枝枝裁翦費東皇

跪地弓腰不自持雲愁月恨總相思南橋有影經霜瘦北館無  
人盡日垂去燕相逢秋雨後殘蟬猶咽暮烟時玉鉤斜畔空惆



悵月落烏啼人未知

消夏即事

春天晨氣雨初晴  
陸羽茶經細品評  
亞字欄干人字柳  
碧紗窗裡讀書聲

偶成

蟬聲初囀碧梧枝  
春去深閨了未知  
滿院綠陰涼似水  
只因多病久無詩

秋夜不寐

竟夕寧飈驚戶牖  
譙樓鼓斷寒檠守  
打門疑有剝啄友  
信信亂吠鄰家狗  
曉起濕雲滿天走  
橫雨打頭寒抖擻  
我欲量愁知幾斗  
侍兒剛熨黃柑酒

菊影

籬畔重重逗冷香和雲著地印新霜半簾低護移秋色三徑斜  
篩碎月光水畔亂迷寒蝶影鏡中淡肖美人妝疏枝掩映難成  
繪誰向秋園畫晚芳

夏夜即事

讀倦拋書出繡帷蟲聲唧唧槿花籬迎風當牖移清簟對月攤  
箋補舊詩且喚小鬟新煮茗側聞鄰院對談棋無端忽感思親  
淚已近秋涼露白時

七夕

耿耿銀河月一鉤誰家姊妹不登樓人間多少癡兒女夜半憑  
肩看女牛

讀項羽本紀題後

烏江遺恨惜英雄裂地分王竟不終子弟八千翔灞上關河百

二失秦中可憐義帝遷郴縣遂使諸侯向沛公天下如何能力  
取拔山扛鼎誤重瞳

輓龍太常蘭蓀先生

久仰龍門未識荆空中旗鶴忽相迎豈徒遺愛私吾邑知有忠  
魂繞帝京半世投簪仍報國疆臣借箸共籌兵藩封受侮邊塵  
急遽壞南天萬里城

卅年歸養慰烏私正是新承寵眷時海宇昇平容漫叟家風淡  
泊絕歌姬丸探黑白除流寇粟輓青黃憫阻飢屬續定知應瞑  
目騷人含淚寫哀辭

噩耗傳來士女傷粉榆聯襁篋椒漿嶺南漫詡科名盛身後誰  
知姓字香獨對人琴懷子敬只應福壽數汾陽描花恰值工夫  
暇也學檀郎撰輓章

畫竹 與外聯句

與可先生性愛竹

程東橋盡日看不足梅日暮歸來自嘖蹙程

此君不見使人俗

梅渭川千畝胸中熟程興酣提筆神且速梅

龍文鸞節咫尺縮

程吮毫筠粉落殘馥梅春芽怒迸生意蓄程

个个向背無重複

梅左右琅玕驚滿目程紙上烟雲起嶰谷梅

室生虛白懸數幅

程素壁風吹戛寒玉梅有時秋雨窗下讀程

疑是瀟湘妃夜哭

梅陡然老幹青霄矗程千竿萬竿拘盤曲梅

古槎橫掃毫尖禿

程縱筆揮灑暢所欲梅蜷節怒作蛟龍伏程高

巢想有鳳皇宿

梅墨汁淋漓滴翠麓程又疑露滴清響續梅安

得淇園買茅屋

程茗碗芸籤伴幽獨梅座中佳士接芳躅程但

願食筍不食肉

梅

雜感

簾捲西風上玉鈎殘蟬聲咽柳枝頭井梧葉落還疑雨籬菊花  
疏似去秋一角斷雲迷暗浦四更缺月過譙樓果看粵海邊塵  
靜斗室何嫌小若舟

時有法越之役警報日至居民遷徙半空

贈外

十載蓬門慣守貧縞綦羞說綺羅新銷金帳底羊羔酒可似寒  
窗掃雪人

滌塵亭

在象峯下亭前有滄浪井

嬉春初過滌塵亭罨畫秧畦漸放青亂嶂夕陽牛嚼草小池新  
雨鴨穿萍賣茶村婦帘無字携榼山僮酒滿瓶石磴掃苔聊暫  
憩菜花半畝戲蜻蜓

晚行自河西務至楊村口占

茅屋鷄聲月已斜  
行裝草草上征車  
前村燈火兩三點  
知是漁家是酒家

送江密庵南歸

傳經心事待如何  
細雨騎驢過潞河  
上策賈生空太息  
待時杜老慣悲歌  
雪泥此後燕南少  
桃李他年漢上多  
任湖北經心書院分校  
未到中年便歸隱  
青霞奇氣漫蹉跎

椒山遺宅餞征騑  
夢冷豐湖憶故扉  
白水梅花尋宿約  
青春寸草戀芳暉  
依人王粲徒增感  
歸去陶潛悟昨非  
他日醴陵傳絕業  
著書多暇侍慈幃

大雪和羅駕部

西林次東坡聚星堂禁韻

言寒夜夢搯床龜  
庭霰欲集烏奴知  
黃雲漠漠壓城角  
雪花如



拳從風吹迷離眩生高士眼蕭條點上衰翁髭西山凝望峯已  
暝蘆溝凍合流不漸灑空亂撲回旋舞垂簷懸柱纍纍危日晡  
未休夜更密平堆鷗尾盈罌絲朵朵鏤成六出瓣天工刻苦誰  
爲爲曉起開門呼僮掃瑟縮箕帚不能持欲買良藥不龜手針  
繡試拈粟生飢寒室圍爐火不暖街頭況有號寒兒十旬九食  
無衣褐樵米賦給當及時白傅大裘志未遂乃令袁生高臥寒  
無幃我家炎海少見雪燕台快靚翩翩姿封松壓竹頗不惡斜  
飛入幕紛糝漓可憐東華天未曙篝燈入直朝彤墀携得霜英  
滿襟袖貂裘却訝羊裘披長孫奏事久僵立天街石滑馬不馳  
何如燕市游俠子熾炭炙肉且銜卮雪中苦樂各萬狀側身高  
詠得天隨陽春一曲誰繼和郢客知當北面之

有感 壬子

容谷牽蘿且賣珠上山何意擷靡蕪夢中折翼驚鸚鵡劫外銷  
魂唱鷓鴣香火從今祠聖女滄桑未盡問麻姑白頭宮女開元  
話紅淚成冰貯玉壺

自題道裝小照贈曦丹女弟

喧寂平分夢廿年郎官和尚亦前緣五更風雪乾清夜可似蒲團  
自在眠

亦曾馱馬訪三招枯樹槎牙鐵索橋殘疏羊皮滿行篋而今一筆  
總勾銷

後學傅子餘編校

附錄

辛亥十二月廿七日致外務部丞參札

數載追隨時承教益日昨國體變更藻翔一官自當消滅對於首領無職可辭上有堯舜之君下不可無巢由之臣白髮滿簪寧堪再嫁貳臣傳末位置太難決議即日掛冠神武披剃入山從此芒屨草笠徜徉五百四峯間作共和幸民於願足矣連夜摒擋琴書赴津度歲一俟冰泮即行南歸相見何日思之黯然唯爲國自愛不盡

遜國詔下余語蘇拉曰此間明日無我坐矣以年包賞之尙書胡維德曹汝霖輩見書曰渠有飯喫余曰既棄官不計無飯喫矣遂行

甲寅秋祭關岳廟宣告軍警揭帖

關岳竝崇大祀以配孔子將軍巡按使率所屬軍警春秋致祭如禮煌煌乎鉅典也嗚乎諸健兒乎古今名將如鯽而關岳兩公獨

彪炳天壤俎豆千古何哉欲知關壯繆不可不知曹操有曹操然後有壯繆也曹操闇于天位弑君酖母挾天子以令諸侯欺人孤兒寡婦狐媚取天下謬比周文王以其子爲周武愛壯繆忠勇欲以富貴恩禮籠絡之使爲己用壯繆不爲所動終從先生拒曹其識之高守之定曹無如何也壯繆若生今日必申明春秋大義以誅亂賊今之祭壯繆者當思效法壯繆嗚呼健兒乎甘爲曹操效力雖有智謀勇略終爲張遼許褚畫花口面千秋唾罵不爲曹操所用雖鼎鑊刀鋸裂尸萬段生爲英雄歿爲明神棗面蠶眉橫刀怒目掀髯而笑英氣懍懍千秋瞻仰果何去而從也欲知岳武穆不可不知秦檜有秦檜然後有武穆也秦檜初爲金虜金人縱之歸使主和議借敵國力以謀大位苟得爲一日之劉豫張邦昌雖割地輸幣稱姪稱臣而不惜岳武穆獨不肯附和秦檜力排和議

而圖恢復卒爲檜忌構成莫須有三字冤獄論者惜其不抗金牌之召直擣黃龍反旆以清君側之惡徒束手就戮銜恨金陀至足悲也武穆若生今日見李完用輩以一紙文書斷送數千里路曠權必憤起撲殺此獠今之祭武穆者當法武穆其將低首下心受劉豫張邦昌之指揮爲小朝廷陪臣乎抑逐劉豫張邦昌以復故國山河乎嗚呼今日與祭諸健兒其毋辱關岳在天之靈也

丁巳正月初二日馮國璋電

廣州陸督軍朱省長鑒賡密何君翽高碩學宏才夙所欽嚮海天梗阻羅致無由加以庶政方殷璋乃肩担重寄非得志潔行芳之士何以爲繩愆糾謬之資擬乞兩公代達鄙衷力爲勸駕如其翩然遠賁益我尤多並盼好音臨電馳企

國璋冬印

賡密冬電江奉何君翹高品學兼優南交冠冕原充廣東脩志局  
總纂慶瀾到粵聘充省署顧問兼全省地方保衛團總局局長諸  
賴匡襄奉電前因何君適赴順德辦賑現甫省旋聞命感激惟榮  
廷慶瀾正資臂助奉電勸駕轉用繫維何君誼重梓桑亦未忍悞  
然舍去敢乞鈞座暫儲夾袋之名勿促安車之聘豈徒榮瀾等實  
嘉賴之

覆馮國璋電奉冬電猥以菲材辱承藻飾仰維盛德益佩謙光浴  
日擎天端資幕府聞風慕義願効執鞭徒以桑梓泯棼未能遽去  
馳驅有



跋

自李唐來言善詩者莫不首推李杜言李杜者莫不目爲詩人詩固非小道然誦昌黎餘事作詩人之句應知士君子立身處世固大有事在也以二子積於中者之厚所志之遠卒莫能達以兼善天下竟以詩人終老又豈其所甘願耶此吾師 鄒崖先生自序其詩所以有德業無所成死後遺詩數卷此最傷心事之歎也

先生當有清末葉世局勞亂與李杜時略同早歲成進士居官小試直聲盈天下嗣又以外務對策上達朝端綵筆千氣象盛稱一時而砥礪風節鑽研學術未嘗一息之懈其後隨使入藏赴印蓋籌碩畫參贊至多於維國權柔遠人美風俗實有莫大之建樹雖未盡其抱負萬一固足以彪炳史冊矣迨 先生棄官歸粵旋來香江丹因得從遊問學時承以力扶正氣迭効權貴之往事相詔

JUL 03 2001

EAST ASIAN STUDIES

示聞之起敬人師往矣猶幸得珍存遺稿昕夕長吟如聞面命而  
諷誦之餘輒憶白傅歌詩合爲事而作之語杜陵詩史之稱益信  
詩非小道也 先生雅不欲以詩鳴且有三十年後乃可出眎人  
之訓丹恪遵不敢渝歲己亥曾豫爲之序藉備刊行牽於人事耿  
耿至今近承同邑何君叔惠之介請番禺傅君子餘覆校既竟因  
付梓人并識數語於後

甲子夏六月門人張丹敬書於香江意蘭畫舍



